



10687

序

婁東瑯琊王氏惟夏其人地文章意氣天下之大無不  
知之重之求一識其面拳拳然恐不得當者十年之前  
與余時相抵掌天下事奕奕有飛揚之氣辛丑後余與  
惟夏以罪誤坐廢余浪游兩河齊趙間五六年不歸而  
惟夏自隱於騷人酒徒之中游匡廬彭蠡歸復愛苔雲  
山水之勝扁舟往來與余相見於吳興握手相慰勞蓋  
余與惟夏之別七年矣惟夏故善詩歌古文詞樂府梅  
邨吳先生歎爲天下無雙之才顧辛丑前惟夏尚欲以  
制科起家繼二美先生數世科名蟬聯之盛屈首應制  
之伎其氣力猶未專其神明尚有他物可以馴擾而牽  
碩園詩稿

序

制之者今則浩然無繫於人世悲吟長嘯中酒高眠於  
山巔水涯寒風冰雪之間其爲詩歌遂益專且銳工力  
加於前數年十倍又身經憂患胸中孤憤抑塞之氣蓄  
久而無所洩如李華所云心如寒灰頭有白髮者如劉  
蛻所云周游晚歸風雨相半者已矣無可言矣於是其  
詩之所蘊益深以厚而出之益頓挫沈鬱纏綿悱惻有  
合於變小雅楚辭之義非近日諸漫然爲詩者可及也  
憶癸巳春三吳友人方以文會之事欲盡去異同之見  
余與惟夏暨嘉定侯研德吾邑吳漢槎郡城章湘御共  
飲酒於宋疇三家各被酒起立漢槎撫湘御背而泣且  
大言曰昔袁本初死曹孟德過其墓哭之甚哀人皆訶

其詐以余觀之誠然耳余與惟夏皆大笑研德疇三亦  
笑其意氣歷歷若昨日事也不數年研德疇三湘御相  
繼蚤世疇三湘御且無子研德有子孤貧不自振漢槎  
久在絕塞萬里之外親死不得歸視日夜南望哭饑寒  
佗倅與死爲鄰此四子者即其詩文遺集皆不可磨滅  
於後世然遭逢若此悲乎已矣今獨余與惟夏生存且  
在江左即俱廢爲耕田鑿井之民然幸無田租井稅之  
累得自放於聖世且惟夏之詩歌又可以信其必傳則  
又非余之謏陋所敢望而惟夏之可以獨慰者也

同學弟計東甫草氏撰

干鱗謂唐無五言古仲默又謂七言詩歌少陵沈著而  
碩園詩稿

序

二

少流轉豈左袒太白歟近體俱宗少陵而或得其雄壯  
或得其雅練分流競爽自成一家非門外人所知截句  
以二十八字寫數十言所難盡者神境固不易到自當  
讓青蓮獨有千古讀惟老諸體發言赴節琅然玉舉而  
七言尤爲擅場所謂萬戶千門重臺複道美人鐘鼓晃  
耀炫亂使人應接不暇者也世有知者當不河漢予言  
辛丑元夕燈下同學小弟姜廷幹醉中漫題

不見王子惟夏兩載矣庚子冬十一月遇諸邗關時惟  
夏將渡淮河而北予將泛巢湖而西執手道故謹泱裏  
表惟夏固善飲與入酒舍洗醖而酌浮滿數十盡初座  
客闕甚聞子兩人聲奪耳皆瞪眸迎視氣爲不吐已而

惟夏出袖中詩稿一冊子命予點次爲序欲載以行予歌之終帙有動於中忽而嬉笑忽而歎息忽而叫若號呼甚且繼以涕泣座客見予笑亦笑聞予歎亦歎或且泣然顧予而泣詰之云不知其所以然惡予之忽笑忽歎甚且泣者惟夏之詩爲之也座客之或笑或歎且泣者予爲之也惟夏之詩足以移予於忽笑忽歎忽泣予之或笑或歎或泣足以移座客於皆笑皆歎皆泣者皆本乎情爲之也夫凡物之不足以動人者雖刀鋸鼎鑊臨於其前華袞玩好陳於其後執夫人而語之曰爾試爲之若是則得諸此不如是則得之彼有必艱於色不則披身走耳即而從焉者百不得一也何也以夫不足

碩園詩稿

序

三

以移其情也夫情之所移誠有不知其所以然者也嗟乎以惟夏之才名日有於四方白眉黃口幾無不知念其姓氏而時之欲依以揚聲者載贄致慙慙奔走絡繹於道路四顧足樂已使之簪筆柱下風流可觀而兀坐窮經孜孜焉取今天下所謂文章之士而雌雄而甲乙之殊可悲也即遲其遇已又出無端之憂患以撓其志意使其湮鬱騷憤不平之氣無所托而一寄之於詩以動人之嘻笑歎息涕泣不又誠可恨也夫雖然君子之心於患難也不以其道得之雖與之會而無所嬰於心其去而過之也若疾風怪雨之驟於空庭若嵐霾瘴霧之翳於深谷少則開霽焉而已君子患夫身之不立名之

不彰也事故之來無故加之而何與所可懼者名日盛望日益重知交日益以衆廣其仰而指之也必益求備吾與惟夏皇皇戰戰視聽言動惟期寡過斯已耳筆墨之事其餘焉者也惡君子之欲立其身於最上也夫亦難矣哉

慈湖同學弟孫金礪拜撰

自宣尼刪述以來言詩者必曰風雅然世能名之莫知其所以名也夫曰風則夸奇炫博鈞深索隱非風矣曰雅則鉅釘襍積俚俗雜陳非雅矣誠有會於斯旨漢魏六朝以迨三唐諸作者可一言蔽之也有明三百年來代興蟬起求其極風雅之致者吾於中吳得二人焉洪武初則高青邛侍郎嘉隆時則王弇州司寇是二公者

碩園詩稿

序

四

天才既高造詣復到每出一語真如鈞天洞庭之奏咸英韶漢之遺神境皆非晚近可及然論者往往左弇州而右青邛不知青邛以壯歲玉折未見其止使天假以年其所就庸可量乎王子惟夏麟洲先生聞孫而弇州先生從孫也又生青邛里中予讀其碩園諸草鏗金戛玉出入風雅真才真識不事模擬而色象天然樂府五七言諸體化俗爲雅鎔古鑄今如星輝月朗玉潤珠圓海市蜃宮變幻百出時花艷女新倩奪眸當世作者雖多似未敢與之比肩也中吳自青邛鳳舉於前迨弇州先生集大成而豹變於後惟夏近傳家學遠紹青邛鸞翔鵠峙吾知中原壇坫自在婁江世業間矣

溫陵同學世弟黃虞稷頓首題

神廟時吾婁元美敬美兩王先生以詩文雄長天下既而崑山歸太僕彈擊之於前虞山錢宗伯抨駁之於後要是文人相輕故智兩王公聲價未嘗少貶也嗣後邾邠代有聞人至惟夏次谷起而旗鼓再振一時文人魁士無不拜在下風即錢宗伯亦謂惟夏不愧兩先生耳孫矣今年春正月子過惟夏凝塵蔽榻爲予丹黃文字疾若風雨因出邇年詩矚予索子序之子非知詩者也同學諸子梓詩集問世子不欲廁名其中少時有作都已焚棄然如惟夏之詩氣度沈雄波瀾壯濶古詩直逼青蓮近體擅中盛唐之勝不可謂雕蟲小技壯夫不爲碩園詩稿

序

五

也子思惟夏門第既高且幼抱驚才絕學使蚤遇則卿相顧足道哉身都華廡而作爲詩歌以鼓吹休明亦惟夏所優爲也乃當此盛年淪落不偶性廓落不問生產兼以無妄減世遺幾盡惟夏不以屑意杜門著書日飲濁醪數斗興至輒奮筆賦詩爲樂嗟乎惟夏之詩真所謂窮而工者也然惟夏之詩豈待窮而後工者哉惟夏負如許才當不僅以詩歌自見乃即此一卷詩已足以媲美前人矣元美兄弟荷主眷甚厚神廟有立德立功立言三堪不朽之褒惟夏念國恩思祖德知不止以文章爲不朽之盛事予雖老尚期與惟夏兄弟交勉之

予之定交惟夏也自竹林之約始入則聯袂出則同車  
共探宛委之藏互醉蘭陵之酌真所謂歲寒與共者而  
自視則蔑加矣惟夏天才敏妙博聞強記不減王仲宣  
斗酒百篇無愧李太白以二美先生爲之高曾子顥先  
生開其堂構其才地誠有過人者江左獨步又何間然  
在惟夏不藉門第以自名而家學淵源亦非儕輩可及  
固天縱於翰墨之場以大其蓄而肆其學者也性頗好  
遊山亭水榭蠟屐殆遍而燕臺江右尤埋轍經年以故  
見聞日博膽識愈奇所接賢公卿益衆以惟夏之才而  
山川助其閱歷世故增其感槩交游發其議論而盡以  
古文詞寫之宜乎倚馬雕龍遂滿長吉錦囊也一日手

碩園詩稿

序

六

碩園集餉示從窗明几淨時發函開卷目駭神迷罔窺  
涯涘予固非知詩者也因舉而質之梅邨先生先生喟  
然曰吾殆與王子矣其雄放得之青蓮沈著得之少陵  
而清潤如錢劉綺麗如溫李無不備於筆畦墨徑中又  
時而爲陶謝時而爲元白縱橫出沒無所不可吾殆與  
王子矣夫梅邨先生千秋人鏡一代宗工也其許可若  
是則碩園一編其必傳於後又何疑乎今讀集中諸什  
嘯石吟泉則天地爲之震蕩傷今悼古則鬼神爲之悽  
愴送遠懷人則風雨爲之飄集拈花賦草則蟲鳥爲之  
飛鳴若惟夏身值三唐吾知盛中之間必添一席矣顧  
英雄數奇磊砢不偶上不能雲升霞舉簪蓬萊興慶之

章中不能釋屨離疏賦雁墮龍標之句下不能良疇廣  
野歌眠蠶獲稻之篇徒令香山白傳馳譽雞林彈鋏馮  
煖彌年客館嗚呼其不過甚矣然使惟夏遇合當世欲  
其缺掌簿書逢迎要路恐叔夜好閒浩然嗜酒有所不  
堪徒以一尺銅符廢却墨莊珠貝亦不以彼易此則惟  
夏之不遇於時正所以必傳於後也不知者遂謂惟夏  
無意於經綸是又不然夫引經斷獄學古入官先王之  
訓也今則有不能盡信者吾輩率其腹笥執墳典以應  
儔俗有鑿枘之不入耳不如寶此一卷爲名山計補緝  
風雅刪定古今能使日月爲之生色經史爲之不磨其  
有功於造物有益於人倫爲何如哉此固惟夏之志也

碩園詩稿

序

七

而亦予之志也因書此以弁其首

同學弟雲坊郁禾計登氏題

余與惟夏交垂三十年知惟夏莫余若也惟夏幼擅驚  
才龍騰豹變甫毀齒卽爲先達文人所推服嗣後試輒  
冠軍名噪海內舉業之暇恣爲詩歌擊鉢韻成叉手試  
就同人相與賦歎以爲李供奉杜分司復出洵足繼二  
美先生之緒而光大之時惟夏少年負奇視青紫如地  
芥日與晨夕數子狂吟轟飲意氣道上昔人謂謝椽三  
十當擁節旄吾黨亦以高車八駟爲惟夏度內事不假  
詹尹卜也今惟夏乃坐奏銷放廢先是惟夏以隣邑株  
連同人餞之吳門舉輟行觴四坐累欷泣下而惟夏浩



浩浩落落若無事者不驚寵辱蓄積有素而其學實因此  
彌進所登者若泰岱之高所涉者若江淮黃河之大且  
深所覩者若京邑宮闕之壯麗所與游者若歐陽公韓  
太尉其人惟夏以窮愁侘傺之餘收攬其勝而一發之  
於詩蓋才力既稱絕人而復得江山之助宜乎其不可  
及也今觀集中古今諸體靡不具備以爲漢魏則真漢  
魏也以爲六朝則真六朝也以爲三唐則真三唐也或  
獻酌紀述則風人溫厚而和平即感憤憂傷亦小雅怨  
誹而不亂隨其興會所至而筆墨皆足以赴之天半我  
媚迴瀾大海惟夏殆兼之矣余向者嘗語惟夏吾兩家  
自過江以來門戶方幅先朝正嘉之際君家司馬奉常

碩園詩稿

序

八

兩公以才名奔走天下爲三百年文章鉅公之冠吾先  
御史抗彈權璫至逢天子怒再賜杖直聲動朝野且一  
則祖孫四世鱗次傳笏一則兄弟四人雁行結綬同時  
鼎盛近代所無播穫荷薪要當共勉乃言猶在耳而惟  
夏失職潦倒方自溷於麴生闔戶著書不求聞達然其  
才日益老文章日益有名從此而往追蹤二美顏頤四  
部亦可以無愧祖宗矣若余之所遇日益困窮年齒日  
益遲暮學殖日益荒落上之無以繩前人下之無以示  
來者其與惟夏相去豈特河漢哉而顧能知惟夏且能  
知惟夏之詩忘其固陋而詮次之以爲必傳使千百世  
而後讀惟夏之詩者或以余爲子雲之桓譚太白之賀

監也是則余之幸已

康熙五年歲次丙午小春上浣年家同學眷弟周雲駿  
頤首拜題

王子惟夏早慧而勤學胸羅經史識洞古今掉鞅菟苑  
者二十載海內人士以誦讀其文章瞻望其顏色爲厚  
幸乃不鄙余之固陋而睽就焉以所著碩園詩集屬余  
評定復使序其篇端余不獲遜焉之手披口吟尋繹再  
四辨風會而邇源流喟然興歎曰王子之詩元本於家  
學且能脩明補救之以弘衍先緒於不窮者也王子爲  
奉常麟洲先生之曾孫司寇鳳洲先生之從曾孫兩先  
生當明之中葉寰宇熙洽人文化成相與倡興古學規

碩園詩稿

序

九

撫曩製其論詩上崇漢魏下發初盛與濟南李于鱗左  
提右挈天下翕然宗之號曰王李同時山陰徐文長挾  
兀鼻頽放之才毗睨其間而勢有不敵厥後公安袁中  
郎恣臆詆訶自其所裁撰輕佻淺易有弄大雅未可云  
朝華已披夕秀方啓也邇者海虞錢宗伯牧齋舉一代  
之作者軒輊之謂王李之學摹擬剽竊飾體貌而無性  
情矜聲色而乏神韻觝排攘斥指爲僞體欲以沈啓南  
祝希哲唐子畏諸君子易其壇坫代其尸祝焉諸君子  
棲遲邛園放浪巖壑其逸情曠致藻思警語溢於楮墨  
粲然娛目然山林臺閣彼此異軌不容偏廢昔日輞川  
襄陽媲美一時未聞因微雲疎雨之句遂使帝城雙闕

春樹萬家擯而不錄也姍姬姜尹姑而里婦邨嫗之是  
譽毀簪纓劍佩而卉衣野服之是珍此亦矯枉之過矣  
且所云摹擬剽竊之病在李或有之而王則不可以並  
訾也弇州之稿具在與濟南相較妍媸得失固有能辨  
之者徒以倡子和女之故同類而共譏之不亦異乎向  
以此言告王子王子心躉之今閱其詩上崇漢魏下發  
初盛此元本於家學者也而復求之錢劉溫李以得其  
清新穠麗之致求之香山劍南以得其真率豪放之氣  
求之青邱懷麓以得其嫺雅恬和之度體無不晰蘊無  
不探美無不茹累無不湔而始成王子之詩也以此爲  
脩明補救譬守其先世之所遺粟紅不可餐貫朽不可

碩園詩稿

序

十

用者棄而弗藏所藏惟充庾之白粲滿籩之黃金也帚  
敝不可操卮滿不可盛者擲而弗寶所寶惟隋侯之夜  
光卞氏之良璧也所謂弘衍先緒於不窮者不因茲而  
愈信哉余嘗論少陵之詩發源於其祖膳部審言膳部  
生於唐初猶踵陳隋綺麗之習至少陵而神明變化獨  
有千古王子由鄙言而進求之益精其所學則所以上  
承司寇奉常兩先生者不異於少陵之繼膳部也王子  
勉乎哉

康熙乙巳六月既望同里同學弟陳嘉靜孚甫頓首題  
才之生也不易而士之抱才而有盛名於時者往往終  
其身坎壈不得志論者嘗疑焉以爲天既生之何又困

抑之若是而要無足疑也才者天地精華之氣天之靳之更甚於富貴而名也者又造物之所忌也故有餘於此者必有所不足於彼乃天道盈虛自然之常而人之所不能違也今觀於碩園先生不其然歟先生清門華胄天稟異資讀書過目不忘有所作捉筆便成宛同宿構未弱冠才名籍甚受知當代鉅公有無雙之目試輒冠軍四方槃敦之會無不引以爲重意氣豪上所至傾其座人一時聲華傳播咸謂科名可引手致而上繼二美先生之遺緒矣顧連躓省闈且以呈誤牽染至被急徵隨例廢錮盛年漢落乃以詩酒自放所居一室圖史狼籍諸生講藝之暇即高歌泥飲以爲常久之廷臣以

碩園詩稿

序

鴻博薦甫入都而病就試寢劇及一官命下而先生不起矣噫何其甚也豈名者果造物之所忌歟抑豐於才者固宜嗇於命歟其亦可悲也已先生於文無所不工而尤邃於詩篇什甚富沒後四十年而先生之孫良穀以手錄全集見示且命一言爲序予得而讀之其早歲所作古體宗漢魏間出於初唐近體規撫盛唐兼法玉溪辛亥後復參之以香山眉山劍南而波瀾益老大抵先生之詩才情華瞻辭氣激昂龍章鳳姿有睥睨一世之槩中更憂患聞道日深流連山水之外間托於老莊竺乾以消磨其壯心剷除其豪氣而抑塞磊落時發露而不可掩先生雖軼軻於時乎其詩卓然成家將必

傳於後世無疑矣武生也晚總角時即耳先生名稍長  
讀選定之書而未嘗親挹其議論風采晚相見於都門  
遽爾捐館夙心仰止深以未得奉教爲憾茲乃回環三  
復於先生之詩而彷彿想見其生平因不揣而識之且  
以得附名於簡末爲幸云

康熙己亥余月宗姪吉武拜識

碩園詩稿

序

十一

當恕軒門人姓氏

吳學尹莘來

黃石穀城

范世鐘書千

顧韶九儀

施允臧淑均

孫基萬蒼

孫岳頌樹峯

吳天錦漢昭

夏璋維章

黃振鷺鶴儔

周啓原望

江起鵬上臨

陸建運任三

王燾陵九

袁燿周圭

程開瀛方洲

程玉藻揆天

黃大觀公安

高寅建初

張瑟靜宜

周岱魯瞻

曹溶露培

王家德臣

張來儀羽文

唐安祖貞遠

郁汝超升侯

周熊徵松崖

何兆熊占飛

江承詩雅臣

倪師霍去病

碩園詩稿

當恕軒門人姓氏

一

金輅素乘

陶承顯文烈

施允升鶴洲

錢文湛士升

王裕令光

呂逢吉景傳

沈一鸚巖扉

周麟瑞庭五

孫三錫錫命

顧弘源星來

李世藻鑑尹

袁瑤魯毓

錢成化右敏

應僎志受昭

陸緜鳴周

董帖陳瞻

張法乾位南

黃光辰天呈

陸以恬功養

施聲鏗拊元

穆文炳虎臣

徐延章鳧青

陳登瀛雲步

吳化廣灝成

林日煌輝若

陸源岷山

王基嶽魯瞻

過學詩翊言

周體心我生

陸遜鳴和

朱養正聖功

董澄文將

金永裕容若

江士超同侯

楊崧宗岳

陳邦彦朝宣

顧守魯省公

孔傳書次鄴

胡信允升

張緝宗孝緒

周政右文

宋偃長庚

張王綸漢垂

金友夏聖思

周基祚胤繩

陸元晉晉明

李象泌鄴來

華謙吉六皆

江宸商哲

張錫綸掌公

鄭秉鈞振民

龔雲藻斐章

陸乘時龍御

胡寬曼碩

夏澄來王

錢王圯康侯

金顯祖念爾

曾同吉蘭坡

楊琪芳德馨

吳豐曾恬

張瑛史公

李世業遠宜

薄靖國允恭

鄒兆熊奇徵

張天掇魯眉

徐雲誕文

碩園詩稿

當恕軒門人姓氏

二

聞鼎臣子調

吳安禮邵臣

李乘龍天御

何兆昌文徵

陳大成集生

毛天驥漢呈

岳金華樹屏

聞瓚臣子黃

周宗枋令瞻

王煥章毓文

尹晨熹得全

方震游吉

夏張琪奕山

曹圯望之

周駿發昉稷

呂于周載錫

吳顯臣熙周

穆文熙敬臣

黃建章宗功

徐日章敷文

汪蔘蓮兆青

楊鳳岐瑞升

孔洵象玉

黃榮聖威

馮應稗真

聞卣臣子釐

楊旋履吉

陳曦明揚

陸宣哲選臣

黃鼎命九凝

碩園詩稿目錄

瑯琊王

吳惟夏著

孫良毅編輯

卷一

癸未至乙酉

古今體詩五十九首

卷二

丙戌 丁亥

古今體詩四十一首

卷三

戊子 上

古今體詩四十七首

卷四

戊子 下

古今體詩三十八首

卷五

己丑

碩園詩稿目錄

古今體詩九十四首

卷六

庚寅

古今體詩六十二首

卷七

辛卯

古今體詩四十七首

卷八

壬辰

古今體詩八十八首

卷九

癸巳 甲午

古今體詩四十三首

卷十

乙未

古今體詩八十三首



卷十一 丙申

古今體詩六十首

卷十二 丁酉 戊戌

古今體詩五十八首

卷十三 巳亥

古今體詩五十六首

卷十四 庚子

古今體詩八十一首

卷十五 辛丑

古今體詩四十首

卷十六 壬寅上

碩園詩稿 目錄

古今體詩七十六首

卷十七 壬寅下

古今體詩八十九首

卷十八 癸卯上

古今體詩六十六首

卷十九 癸卯中

古今體詩七十一首

卷二十 癸卯下

古今體詩五十六首

卷二十一 甲辰上

古今體詩七十五首

卷二十二 甲辰下

古今體詩一百十四首

卷二十三 乙巳上

古今體詩五十九首

卷二十四 乙巳下

古今體詩五十二首

卷二十五 丙午

古今體詩四十五首

卷二十六 丁未

古今體詩四十七首

卷二十七 戊申

碩園詩稿 目錄

古今體詩六十二首

卷二十八 巳酉 庚戌

古今體詩四十首

卷二十九 辛亥至乙卯

古今體詩五十六首

卷三十 戊午 巳未

古今體詩六十六首

碩園詩稿目錄 終

碩園詩稿卷一

癸未至乙酉

琅邪王 吳惟夏著

孫良穀編輯

七夕遇雨

高閣迎秋落濕螢  
夜涼獨聽雨淋鈴  
何期牛女星橋會  
却帶巫山暮雨行

讀宋史感南渡時事

建炎不遠靖康年  
何事錢塘共戴天  
士女猶懷舊京闕  
君王自愛半山川  
轅回絕塞眸空倦  
檝擊中流肘忽牽  
檢罷殘書餘搯擊  
六陵風雨一燈前

新霽

晴餘涼更催暫喜滌炎埃  
暗雨浮空歇疎雲帶濕迴  
客碩園詩稿卷一  
一  
驚新水漲僮買小魚來  
返照宜憑望高窗向夕開

萍

輕漾池塘點點鮮  
相遭荇帶與荷錢  
可憐水上無根草  
也結人間聚散緣

秋日偶成

落葉隨風到曲櫺  
閒堦草帶雨痕青  
主人已熟悲秋味  
缸面新嘗醉不醒

宮怨二首

苔生望輦處月上聽鐘時  
寂寞空房夢君王那得知  
秋風何意至扇影尚依然  
記得新承寵蛾眉畫亦妍  
病中聞沈子荷百亦病不能走視東之

茂陵風雨未相聞，却有詩筒寄碧雲。  
立晏餘生方患我，休文同調轉憐君。  
蕭條病渴情偏似，寂寞悲秋味亦分。  
回首南樓花月下，可堪吟罷倚斜曛。

已上癸未

### 松陵長橋步月

荒城俱暝色，憑眺思何窮。  
黯淡林間月，參差橋上虹。  
波光連岸白，漁火墮邨紅。  
搔首孤吟處，身疑在絕空。

### 聽聖隣上人鼓琴

至音在岑寂，逸調天外萌。  
迥爾若無意，戛然時一鳴。  
林高鳥聲落，窗虛竹風迎。  
能使塵襟散，兼令心脾清。  
徘徊落暉送，屏氣俟曲成。  
乍操烟雲合，曲成風雨驚。  
素絲亦何意，乃能極此情。  
吾聞昔賢技，落霞流水聲。  
其中有禪理，立解焉可名。  
爲語操音者，吾能悟無生。

### 碩園詩稿

卷一

二

### 春郊口占

暖雲如粉草如茵，二月江南風景新。  
行盡小橋流水徑，落花還似去年春。

### 微雨再登虞山最高處

選徑探幽勝，扶筇到幾重。  
天低通積水，雨暗失孤峯。  
山色平看樹，溪聲遠聽鐘。  
登臨疇昔事，念爾重相從。

### 舟行澱湖卽事

湖光天外合，蒼氣遠林開。  
野岸驚無際，孤帆似不來。  
雲生山影亂，風急浪花迴。  
暮色迷荒渚，歸程一笛催。

### 感事詩四首

中原一望恨何窮故國輿圖已半空玉壘初猶驚去輦  
金輿今已泣遺弓山河長往精靈在箕尾相隨大義同  
草莽痛餘還欲頌千年猶笑景陽宮

猶道潢池戲揭竿忽驚烽火滿長安鼎湖雲去千山暝  
湘水烟生六月寒城闕已知成舊國殿庭何意舞羣官  
眼前無限新亭景愁聽清歌玉樹殘

妖氛已動燕秦甲朋黨猶操南北戈報國罕能甘伏劍  
反顏多見再鳴珂未留蜃輅三聲淚競蹋龍城萬歲歌  
回首當年凝碧事清霜荒月怨銅駝

風景悽人八百州不因笳鼓動離愁烟低未黍悲秦鹿  
日暗乾坤恨楚猴千古江山頻咽夢一時花鳥乍驚秋

碩園詩稿

卷一

三

中流有楫誰堪誓莫遣腥潮打石頭

遙哭許玉重先生二首

漫將生死等閒看化碧千年血未乾泉下始能攀聖駕  
世間今不薄儒冠

百年有盡果誰存華屋山工豈足論寄語長安冠蓋客  
青衫亦是感君恩

漫興四首

仙人身住白雲間剩有塵寰潑墨斑借問文瀾何處濶  
蒼虬吞日海吹山

乾坤何地足生涯無數青山興尚賒玉洞藏書滿千架  
不知門外落桃花

嘯傲江東有步兵沈埋土木自多情茫茫不慣留青眼  
老却春風酒數罌

萬古江湖譽未虛詞章徐庾賦相如仲宣詩律無從問  
敢道中原麟鳳疎

閒居

長日銷殘暑幽居避俗嫌竹風翻故帙鳥語漾晴簷興  
逐吟情冷愁兼酒病添相忘身世事祇愛北窗甜

憶夢二首

昏昏燈影落桐牀雪態雲光欲斷腸酒醒夢回人不語  
耐他明月半窗涼

輕風何事動簾櫳似送淒聲到枕中顛顛欲將殘夢續  
碩園詩稿 卷一 四

不知窗外有梧桐

秋草

秋草散牆陰苔痕斷續侵朝來微雨過寒綠滿青襟

夜坐

獨坐一燈白虛堂來夢遲蟲聲寒砌出雨意小窗知有  
病驚秋氣無言對酒卮霜鴻天外急還爾故人思

偶書

清色足朝夕高軒幽意留著書惟頌酒謝客半科頭  
日上牆老暗風梧樹秋茫茫今古恨誰復問沈浮

冬至齋中小飲得人字

寂寞留荒徑相過喜故人薄寒江上月半濁甕頭春靜

語看燈盡微吟聽漏頻風塵吾久厭剩有醉中身

甲申

字

春日仲方叔偕李漁隣見過分賦齋頭老梅得秋  
履齒苔能破枯枝爲客留疎籬寒帶晚淺水淡疑秋對  
影嗟生意傷時惜望眸停杯還共語雨氣滿南樓

看杏城南步仲方叔韻

柳色依然是漢南滿郊春色喜初覃疎芳雜引開花徑  
一水迴流帶草庵應傲桃源空悵望何如梅閣共幽探  
呼尊共醉殘陽裏惟恐中山夢未酣

遊樂郊園再疊前韻

猶餘春色在江南踏遍青蕪興已覃綠水半篙宜野艇  
碩園詩稿

卷一

五

白雲一塢識僧庵石斜松架須紆步路雜花源好細探  
履齒只今無恙否明朝風日又清酣

醉中失足折齒賦以自警

誰道呼杯後朝來失嘯歌浮生甘荷鍤達節未投梭舌  
在差堪信脣亡更奈何酒星誠可禁莫使又蹉跎

周子做過仲方叔齋小飲

春盡誰相過高齋惜夜餘短歌愁欲絕長病酒還疎屐  
響三更雨燈明一架書壯心應共許世事眼看虛

雨

客思驚梅雨空階一夜愁陰廊苔影靜古屋樹聲秋烟  
濕迴孤鳥沙明急亂流閒聽老農語却喜足春疇

月夜放船

微月生秋浦舟輕逐岸斜迴橈飛宿鳥急槳退寒沙風  
雨初驚浪星河欲近槎所傷生計盡客泪獨天涯

近邨閒步

何處尋幽境雲迷路幾層人家離市少溪水近秋澄徑  
僻嘗驚犬庵荒乍見僧坐看天欲暮隨岸出漁燈

憶姊

每見歸鴻便愴神行吟只剩亂餘身當年却羨湘江上  
猶有申申詈屈人

憶弟

故鄉天末去無程渺渺歸雲離別情怪殺日來無好句

碩園詩稿

卷一

六

却緣春草未曾生

憶妹

天涯作客一身危立遍斜暉還爾思猶憶去年燈火夜  
秋窗學讀小詩時

久客

久客長如夢危魂輒易驚關河全殺氣鴻雁自秋聲愁  
病兼人鬼親朋隔死生可堪寒雨夜獨坐憶圍城

秋暝

蒼氣知何極荒原野色分山寒長昔日水遠自侵雲漁  
火隨船落邨舂隔岸聞此時孤客淚獨向暮鴻羣

中夜驚聞兵至



一天寒月冷柴門愁絕清宵旅客魂忽聽傳呼烽火近  
獨攜詩卷走荒村

夜泊蘆渚

驚定心方覺蘆洲泊此身溪流沿處曲邨落望中新露  
重添衣急星低視夜頻鄰船莫相問同是避兵人

感懷四首

笳鼓連天客路來江南今動子山哀殘紵帶雨迷芳草  
鬼火燒楊過夜臺鄉國秋來知未改干戈日接反無猜  
登高一望千年淚廣武英雄恨不回

萬國烽烟眼倦看客心長自憶南冠泪隨秋水江花老  
夢寄春風越燕殘古堞霜清笳吹迴野田日暮馬聲酸

碩園詩稿

卷一

七

永嘉此日方多難何處東山起謝安

十載中原戰伐秋千年遺恨哭荒丘風塵久客忘鄉語  
烟月多情念昔遊愁緒已同平子賦歸心空老仲宣樓  
可堪衰草殘陽裏隴水潺湲更比流

飄蓬孤影九秋餘剩有歸魂憶井廬戰壘半殘沙石亂  
爨烟新聚水村虛故山景落愁中句舊識人傳夢裏書  
回首傷心事多少生涯終欲問樵漁

宿雁

豈戀此邦菰米樂應知南北路途艱昔年係帛憑誰語  
近日驚弓媿汝閒風急空聽雲影裏水寒還見葦花間  
相期月黑高飛夜莫送秋聲慘客顏

大雨行

君不見去年苦旱無救麥土膏寸枯千里赤日盡長空  
雲片乾老穉相攜望秋陌又不見今年大雨卒未休天  
潢倒注滄海流黑蛟嘯風太陽匿兼旬矇昧忘春秋此  
時鄉國烽烟起鐵馬長驅飲江水幾多逃死避兵人可  
憐半委泥塗裏泥塗宛轉誠堪悲行人無數泣路歧其  
間還有最悲事白髮老翁攜幼兒初傳干戈在中路兒  
飢索食老翁怒相視無非骨月情伴棄道旁渾不顧須  
臾持抱却同行前阻大澤波迴縈翁時褰裳左右顧牽  
兒欲涉神還驚子也觀之心悽楚艤舟往渡無疑阻相  
憐同是窮途人無聊且與老翁語翁言舍北三兩家孤  
碩園詩稿

卷一

兒背面啼阿爺更有東隣十五女被驅馬上弄琵琶猶  
記先皇世全盛野農無事耕作競今朝荒主輕山河却  
將溝壑填民命坐使流移滿道塗鋒鏑所及皆無辜我  
今生死亦未曉所知今歲田園蕪子聞此語轉嗚咽翁  
自吞聲前路別船行風浪夜冥冥兩岸青燐盡鬼血

中秋旅宿

良夜如何過羈魂坐自嗟清光初對月孤影正隨查屋  
淺露還入草深蟲亦譁心傷此佳節辛苦故園花

舟行至界口

作客心猶苦歸舟路已悲人民新舊在行旅去來知雨  
岸寒花老霜林病果垂何堪還故國空自憶前期

抵家感賦

久病驚秋老，新歸似客貧。已知人事改，翻覺故鄉新。漢  
落寒衣雨，心灰破帽塵。家園蕪未盡，還欲謝親隣。

彈琴歌贈王生若愚

海氣吹山嵐，危蟾蜍夜冷雲遲遲。玉羊白鶴爭翔舞，  
此時王生調素絲。初彈逸響振孤嶠，青松滿崖鳳鸞嘯。  
俄聞轉韻發清悲，喁喁更作低徊調。操出湘妃離別情，  
烟雨暮寒楚水平。啼逐幽蘭恨未歇，一一寫你絃上聲。  
聲隨曲闌絃始熟，哀感霜旻慘林谷。高鴻蜿蜒不忍離，  
雌飛悲鳴乍相逐。正如塞垣聞悲笳，蓬根夕卷吹黃沙。  
可憐一曲傳幽怨，叫殺前窗滿樹鴉。嗟予傾聽情正深，  
碩園詩稿

卷一

九

自傷猶是異鄉心，胸懷荒悴愁空積。無言泣視秋天碧，  
不知至曲本殊常。不知子情感易傷，欲從君學君山操。  
莫秘成連海上方。

集在東叔齋感賦得顏字

愁緒猶餘花月間，相逢却似暫開顏。霜凋亂葉悲秋老，  
人怯清觴覺夜閒。燕市有歌聲半續，湘魂欲吊意誰關。  
寒膏此夕燃當盡，忽憶身從夢裏還。

即事

淒心到秋盡，搖落景俱侵。庭暗翻梧葉，堂虛受竹陰。獨  
醒還病酒，無語却成吟。靜憶巴山夜，中懷與共深。

題宗人宣遠畫陶元亮六圖

上古日已遠世事隨紛麻與世勤成役馳逐悲蟲沙緬  
懷栗里叟寄志凌幽遐蘭雪激清風千春真莫加詩篇  
今傳誦紀年無元嘉吾宗有妙筆點染成烟華圖叟正  
壑間形神靜無譁琴書亦生潤草樹分陰霞貞心位蒼  
官孤芳表節花宛同昔吟咏琴酒懷羲媧開帙乍披攬  
喟然興嘆嗟嗟林澤當共遊長繫豈匏瓜江左事非遠幽  
棲志猶賒此中可結茅吾欲置吾家

冬夜同楚中黃敬渝集湛止上人精舍得僧字

佳會當斯夕相逢嘯咏興宵光寒動月人意靜隨燈同  
調懷湘澤窮途媿茂陵蕭然禪榻畔無語對山僧已上  
乙酉

碩園詩稿

卷一

十

碩園詩稿卷一終

碩園詩稿卷二 丙戌 丁亥

十宮詞

館娃宮側菱荷香無數宮娥盡越妝殘夜水風涼入骨  
更呼女伴換羅裳 吳宮

誰教巫峽雨雲過多少纖腰怯綺羅爲問大夫曾作賦  
夢中人比妾如何 楚宮

複道新開十二樓君王何事欲東遊  
斬年宮內春無限 可似驪山六月秋 秦宮

鴛鴦殿冷鎖殘春隔院遙傳駕幸頻見說長門賦已奏  
如何還憶李夫人 漢宮

燈火連天夾道槐漳河宮殿一齊開  
內家新得神針手 碩園詩稿 卷二

記取佳名喚夜來 魏宮

坐理殘妝待至尊華林園裏月黃昏  
珠簾今夜休教下 恐放羊車過院門 晉宮

長圍纔撤笑聲譁白玉階前喚宅家  
試看阿潘羅襪底 定於何處起蓮花 齊宮

玉樹歌終墮舞鈿平臺霜冷月華鮮  
江郎此日承恩醉 倒寫蠻文蜀錦箋 陳宮

新侍金輿得渡遼不如歸看廣陵潮  
前頭錦纜纔停處 繫在朱闌第幾橋 隋宮

朝來車駕幸華清一曲霓裳舞袖輕  
且喜崖公心覘斗 自將玉指按新聲 唐時散樂入呼天子爲崖公  
權喜爲覘斗 唐宮

秋思

疎窗闌清氣極目暮天空落葉時驚鳥哀蟬尚引桐涼  
生斜漢裏秋老片雲中愁緒知何似庭臯句未工

代壽吳翁七十二首

耆年當舊德共喜駐芳晨文史傳名閥衣冠識古人紫  
芽塔下秀絳樹洞中春引杓終婪尾醅顏看歲新

代是更新會生猶全盛時名尋高士傳語作古人詩灌  
圃身還健看山約未遲葛巾籬下坐把菊頗相宜

翁生  
日在

九日  
前後

殷子陟明過訪得橋字

同許混漁樵相尋不待招淵源推逸少摩詰識殷遙竹

碩園詩稿

卷二

二

塢翻詩窈茅齋潑酒瓢柴門相送處沙碧水平橋

已上  
丙戌

獨坐

獨坐不知晝寒深春事虛翻書消宿酒聽雨憶新疏牢  
落風塵裏蕭條歲月餘可堪三徑冷莫問草玄居

懷沈子荷百

時荷百移居  
西山之麓

鹿門踪跡近堪傳媿我風塵未息肩芳草無情春自老  
空梁有夢月虛圓柴扉小築樵漁伴塵尾玄談木石禪  
却憶孤斟細雨夜

荷百寄予詩有細雨  
村醪且自欣之句

知君還念剡溪

船

荷百曾約予過山  
中予以病不果

雜感八首

棘門兒戲事還空一夜平陵亘白虹二十五州多鑄鐵

錯令天下殺英雄

陣前猶未落地矛隴上歌聲暗欲愁面縛出城應自恨  
豈知末厥有奸謀

棘門日落馬羣嘶闔部爭傳動鼓鼙空使檻車囚士季  
何曾收得鄧征西

黃門聲望自當今魂逐胥濤痛莫深回首河橋終一劍  
媿他草檄說陳琳

清風千古獨冠纓恰合西山處士名含血頭顱留片語  
孝廉一死不曾輕

張儉逃名事尚賒孔融闔宅已堪嗟報韓壯志成何事  
贏得忠貞說下家

碩園詩稿

卷二

三

天意難噓炎井烟彈冠空自望他年夕陽亭下傷心景  
多少湘纍哭杜鵑

海國風帆已失期旌竿先折恨難支誰知異代清流禍  
猶似先朝黨錮碑

贈尤展成二十二韻

大雅今寥落君才古莫如清芬標沈謝妙思匹應徐茂  
苑名猶昔江東秀獨渠流風迴白雪曉日挹金蕖潤步  
驚天馬潛心老壁魚句堪追正始筆欲過黃初意氣開  
湖海文章耀里閭高情傳翰墨美譽動簪裾月露思窮  
異烟霄志望舒方期賓魏闕孰意守寒廬燈火殘春夜  
鶯花遠夢餘片雲催客棹小邑下旌旗罕接題門語還

遲問字車何當把杯盞却愛侶樵漁清嘯分林樾立談  
共几蘧傳觴看舊劍話雨剪新疏郭泰舟思附陳登氣  
未除不須傷偃蹇且喜忘親疎歷落當推子飛揚漫聽  
予時危猶慷慨道合敢躊躇知爲風塵惜頻煩齒頰噓  
短歌聊報爾箋錦詎成書

贈周臣納姬詩

次尤展成韻

綠窗彤管記姬姜此日毛嬙喜屬郎

姬故毛姓

却月淡描京

兆黛迴風輕點壽陽妝桃根恰合歌中句蘭葉應徵夢

裏香惆悵鏡鸞當日事豈須重問少君方

周臣新失偶

贈異公納姬

即用前韻

珮響瓊琚美孟姜雲軒偷嫁玉京郎夜挑紅燭栽花史

碩園詩稿

卷二

四

曉看金屏鬪粉妝帳煖芙蓉長憶笑衣薰豆蔻乍聞香

怪來誰似眉顰巧筆底青山好比方

異公善畫

調端士

太原兄弟後先納姬獨端士側室尚虛再用前韻調之

閨德須知並邑姜一門何事笑中郎芝蘭漫喜前庭種

端士已得子

桃李還輸別院妝湘瑟秦簫聽去苦巫雲蜀雨

夢來香愁心應憶蓬山遠悵望明河在一方

吳聖符納姬吳門不得歸而自嘲輒次其韻

爲問星橋阿那邊牽牛空借定婚錢

牽牛欲娶織女借天帝錢十萬聖符

適假人阿堵往吳門故云

雪綃並玉應遙妬月扇雙輪只半圓

聖符已先

有一

南國黛眉添舊恨西亭翠被憶當年閒情共惜尋

春晚莫笑揚州杜牧篇



夏日大雨喜杜二九高從雲間來挈飲鄰園撰懷  
堂得懷字

故人多難欣重見未怯衝泥過小齋海內風塵詩卷在  
天涯兄弟夢魂乖愁憑綠酒窮相送恨許青山骨共埋  
憶爾旗亭明發路雙航湖水愴離懷

賀沈節推壽二十八韻

生日正直七夕

南國名藩峙西曹宦績存雄風浮渤海盛業界崑崙江  
漢家聲舊東陽吏隱尊五雲看氣色三峽問淵源壯節  
空霄壤高懷耀冕軒需才須紫禁佐理暫朱轅道識斯  
文重聲因輿頌喧桑麻留古俗桃李映當門日煖芙蓉  
幕風清楊柳邨兒童謠至德父老識新恩法案推懸鑑

碩園詩稿

卷二

五

冤情鮮覆盆鳥啼人吏靜花落訟堂溫喜詠禾駢穗驚  
依鹿兩轡素商時乍報炎氣日初習浙浙金風集團團  
玉露繁弧懸逢令序嶽降自台垣芝駕來中極璇居憶  
少原歲星牽楚尾福曜遞吳根月桂河邊老天榆漢曲  
翻昌辰開壽域佳氣燭蒼垠絳節雲爲幄丹臺霞作殮  
藜光分太乙綵縷祝天孫治行標清望銓流藉雅論鳳  
毛高錯落鵬翮健續緜造化同虛槁童蒙怯負暄相應  
憐涸鮒猶自媿登敦願切鰲山頂心銜鯨海魂華封如  
可效敢爾獻芳樽

七夕同子俶家次谷訪九高集撰懷堂

一樽塵榻共茶瓜佳節開襟興未賒喜自羅巾來嬉子

涼生團扇掩蟬紗  
腫隴月勸銀船酒  
宛轉歌聽玉樹花  
會看杜陵詩興好  
銜杯只擬醉君家

初八夜復飲子倣齋即事戲登前韻

盤筵猶自供鏤瓜  
織女斜河事已賒  
香夢初溫冰玉簟  
酒痕半濕水波紗  
涼天解帶遺針縷  
狎坐留賓暗蠟花  
吟罷轉憎蓮漏短  
夜闌燈火怯歸家

病中書懷六首

秋病尋常有  
今秋亦偶然  
燈光方丙夜  
藥裏獨丁年  
饑鼠欺殘燭  
寒鴉競曉天  
藤輪空自倚  
得句可能眠  
佳節俄驚過  
空堂覺書長  
雲花消病眼  
石葉憶仙香  
聽雨時欹枕  
攤書日滿牀  
悲秋應有意  
非爲泣寒螿

碩園詩稿

卷二

六

漳浦人長卧  
文園賦未成  
塞鴻當月落  
篝火入秋明  
覽鏡身猶在  
呼兒語自驚  
風流天下盡  
吾亦厭餘生

馬革由來誓  
牛衣未忍啼  
酒知前夜醉  
詩憶去年題  
寒夢三更失  
秋聲萬葉齊  
傷心今日事  
不敢聽荒雞

梧井團朝露  
茶鐺急海濤  
夢真同鄭鹿  
身竟似吳孫  
霜簟秋前冷  
風砧日暮高  
東軒時倚徙  
猶自怯松醪

一榻秋寒重  
兼衣瘦未勝  
人星雲或掩  
俗傳識人星  
不  
瘡故  
鬼雨草空凝  
李長吉詞鬼  
患瘡子病久成  
雨洒空草  
閑閣同玄晏  
投川笑子

昇松雲長入夢  
未老已如僧

舟行書所見

遠山晴不斷  
斜日半江吞  
白雪鯨波急  
黃雲蜃氣昏  
驛

樓風送客漁墅水圍邨愁絕青楓落蓬窗酒一尊丁巳上

碩園詩稿卷二終

碩園詩稿卷二

七



風送客漁墅水圍邨愁絕青楓落蓬窗酒一尊丁巳上

碩園詩稿卷三 戊子上一

謁宋韓蘄王廟

閩闔城邊簫鼓哀，神鴉片片夕陽催。  
百年舊恨金山在，千里秋潮鐵甕迴。  
蜀相空祠荒翠柏，錢王殘碣冷蒼苔。  
可堪畫壁丹青暗，佇看臯亭白雁來。

入春偶賦

韋曲鶯啼柳影疎，蕭齋風雨事何如。  
寒山入夢青無數，細草含春綠有餘。  
每恨病多難止酒，自憐金盡怯收書。  
浣花春信年年老，未肯無因賦子虛。

同王宗衍何際五吳聖符德藻家次谷集周臣端  
士南園看梅五十韻

碩園詩稿 卷三

勝境先朝舊名賢，江左遺草明陶令。  
宅春滿習家池，松榭延新景。  
金堤記昔時，清觴開梓澤。  
小牘訂蘭期，岸柳芽猶淺。  
山櫻果尚遲，樓臺閒鳥思。  
風日淡嵐姿，紅沫題門榜。  
青帘認店旗，蘚荒沙積磴。  
槐暗土埋碑，看竹輿纔遍。  
逢樵路漸知，方塘魚偶見。  
閒徑鶴長隨，賓主談堪敵。  
松篁置各宜，盤園欣得侶。  
東閣好裁詩，粉瘦將疎影。  
瓊寒乍發枝，湘葩看纍纍。  
翠羽映檝纒，細細香難辨。  
苔苔玉半欹，藤深留雨慢。  
苔古護霜皮，月魄孤須絕。  
冰魂凍不移，灞橋矜雅韻。  
庾嶺憶佳詞，靈苑斯應匹。  
英流會在茲，文章均季重。  
人物似僧彌，何遜才偏雋。  
王琪詠果奇，紅梅詩點茶容渴。  
吻敲字失吟髭紙，落催雲子篇成。

待雪兒興酣過雁渚神爽到鷗陂嬾亦分遊屐狂須墮  
接籬輕謳林下出殘笛水邊吹入座揮張塵登樓覆謝  
碁呼盧喧得采舉白喜盈卮霜刃批鱗鮓雕盤熟乳糜  
烏頭藏芡餌鴨舌誤蓴絲禪燭燃仍短蓮壺聽轉疲後  
筵慚酒吏狎坐惜花媵撫跡頻留睇含情更結眉芳辰  
嗟晚晚病骨厭支離漂梗身如寄衣冠恨莫持永嘉時  
正似天寶事堪追妖氣纏雙闕冤烟咽九疑艱虞方覩  
此喪亂竟誰依蕭瑟窮亭障縱橫劇虎羆樹巢多塞燕  
野哭盡江籬畫角愁中老啼鶯夢裏疑干戈三載地吳  
楚百年思歲序乾坤改關山戎馬悲無書傳越絕有淚  
泣湘纍醉欲逃千日歌惟托五噫蒼茫傷鳳德感慨學

碩園詩稿

卷三

二

鳴夷笠澤吟何在桐江釣漫垂未能從寂寞且爾聽安  
危看駐深杯綠同娛短髮緇相逢琴嘯樂痛飲洵吾師  
贈沈遜山三十次友人韻二首

上苑風光正及辰茂陵花酒又逢春黑頭豈合猶初服  
白眼終須少俗塵江畔落梅憐底事山中芳杜憶伊人  
懸知近賦郊居就可共王筠話隔旬

靈均誕降屬元辰恰趁燈花祝早春

遜山生日在燈節後

文筆好

裁梁苑賦征衫初染薊門塵

遜山從燕歸

酒才歷落推同調

詩態蒼茫過昔人回首昔年相對話夜窗風雨幾經旬

代壽袁翁六十

汝南舊族推名德束髮文聲走無敵詞章霞錦試剪裁

書史縹緗恣搜拾手揮宣毫若有神開篋驚看璣貝新  
胡然鬱此鸞龍彩怪底猶爲蓬藿人吁嗟咄咄青衫老  
掾飯菁羹時未飽賣賦曾無一稜田稜去聲幾年垂翅風  
塵道回首烽烟海內愁浮雲冠蓋男兒羞長安貴人多  
踈跌黃金橫帶誠何求縱使宦游京雒里梁鄧金張只  
如此避世何如蘇嶺賢桂靜松閒眠不起此日逢君皇  
覽辰落梅時節幾經旬青槿籬邊花事早紫桐陰下烏  
聲頻庭前喜育謝家秀體質金莖與玉豆爲祝先生緇  
髮長喬齡能倒三松壽君不見彭澤斗酒杜陵詩風流  
千載爲人師看君掀髯開甕醪茅屋門前春草綠

十紅詩次大雲原韻贈女郎張素

碩園詩稿

卷三

三

碧玉新妝試曉風鶯嬌燕姁黛顰中羣芳雜下稱奇絕  
未必輸他一撮紅

自是雲容神女風羞簪媚蝶兩鬟中鹿胎冠子芙蓉帔  
笑折山花繡頰紅

傳來桃葉渡頭風金縷歌聲小扇中留得鏡湖遺事在  
一時卷翠更低紅

蘇小湖邊柳岸風秀香名冠綺羅中相逢絮語郎須記  
家住桃花滿徑紅

回首鳴珂舊日風綵雲聲斷鳳樓中秦娘零落秋娘老  
春色應看獨小紅

蘭臺綺席畫樓風雜坐藏闔月正中半捲疎簾半殘燭

斟來淺淺海螺紅

舞袖香飄冰麝風碧廊輕語萬花中東山詩酒同遊賞  
寫與新詞號比紅

玉笛梅花陣陣風梁塵暗落酒杯中清歌自得周郎顧  
何用拋差小豆紅

春深偏妬雨兼風翡翠雙棲憶夢中料得有情憐小謝  
可曾留寄軟綃紅

揚州夢斷葉啼風酒病詩狂十載中自笑關情非杜牧  
那堪樹底問殘紅

慧文閣同甄玉烟節子傲荷百可中諸子分賦夕  
陽影裏梅花限韻得來字二首

碩園詩稿

卷三

四

歷落疎枝映綠苔昏鴉多少傍枝回暮烟欲暗冰三面  
殘雨新寒玉一堆姑射仙姿天半出壽陽春色日邊來  
凌風閣畔頻相見莫把檀香別種猜

臘梅花本  
名檀香梅

冰姿雲魄舊仙裁遲暮江天倍可哀金谷乍飛春欲去  
玉樓斜映月先來香窺水檻低猶隱影上苔牆曲更迴  
想到黃昏魂斷後隔溪風笛好相催

和黃庭表王異公初春感懷詩次韻十首

小閣風烟病裏消碧雲佳句若相邀恨偏燈火三春雨  
淚盡鶯花萬里橋翠桁欲棲新塞燕錦帆空蹋舊江潮  
愁心猶夢承平景月落鐘寒又一宵

倦聽黃鳥枕書眠眼暈看花興惘然海上精靈疑化石

臺邊草木記思烟

用介子推事

催盃促拍新年酒燒艾煨針

寒日天極目那堪風景異高峯南北夢魂懸

時子做客杭

長分閒身伴釣鉤荒園併已謝羊求愁時細雨輕觴醉

晴日江橋野市遊乘興欲尋清月社傷心還記夕陽樓

眼前多少南冠淚甲第歌鐘舊五侯

驚心碧草漸斑斑春思如雲亂未刪贈子慚無青玉案

愁子恨失紫芝顏

異公本和黃子庭表原韻子時猶未識庭表故云

湘魂弔去

山川隔蜀魄啼來道路艱遙羨匡廬雲霧窟六朝風雨

一僧閒

鄴杜花傷近日心清歌一曲武林深久擿世事隨飄瓦

還許交情比斷金玉壘風雲猶變態朝川山水自清音

碩園詩稿

卷三

五

東臯回首應揮涕槐柳朱門十里陰

桃李芳菲已滿枝蕙蘭幽鬱自相知長思明月樓頭事

空笑青山眼底兒三徑柳垂陶令宅一庭花落董生帷

太原昆季時相過從異公獨扃户不出

還看樗散年來似醉裏呼君老畫

師

曲江東去灞陵西烟惹青樓柳色低白盡茶花春欲老

紅殘香雨鳥還啼蘭舟曲響開魚浪竹町旗翻出馬蹄

回首承平曾幾日江南江北遍征輦

佳節蹉跎覺易過壯心無奈蒯緱何邨家水奠松楸近

列聖山陵烏雀多鄂渚旌旗春轉戰潯陽烟月夜聞歌

何年却詠收京事依舊長安花錦窩



寂寞牆東又幾秋。湖山應解笑巢由。目前生計枝棲鷓。  
世上浮名木撼蟬。南北史看天地事。短長亭識古今愁。  
薜衣荷笠他年約。會擬相尋青玉洲。

小築幽棲世外情。柳疎梅墮兩無爭。劖殘竹子烹茶好。  
斲就桐孫壓簟平。已付殘樽消楚漢。何妨冷眼看田彭。  
只君栗里新詩在。異公詩有義熙甲子傷心事之句可許王弘附姓名。

偶借甄玉昭。芭烟節際五子俶。家次谷集楊氏園。  
看牡丹醉中戲爲長歌。

長安三月道上行。雜花成蹊奪眼明。杜陵韋曲一回首。  
多少豪家花酒亭。莫笑人間重富貴。須知花自愛晴明。  
富貴花中推第一。一晴明看來神倍出。名種傳聞自雒中。

碩園詩稿

卷三

六

張家園裏汾陽宅。倒暈檀心種自奇。九藥真珠價莫匹。  
移向弘農舊午橋。碧油枝上綴芳苞。瓣簇平章八搭錦。  
色分學士四金鷗。雨過庭前嬌欲舞。高低枝影自相伍。  
高駕朱鸞喚絳霄。低攜翠被臨江渚。疎莖看時午更稠。  
金谷園來不解愁。雙雙自擎碧玉蓋。茫茫誰辨紫雲樓。  
輕陰淡日相尋去。低頭一顧難爲置。春衫欲典醉花前。  
縱不留儂儂亦住。況復同遊興不孤。眼前盡是高陽徒。  
綵毫未列詞人座。白箸先開醉客圖。主人自出紅梁醢。  
玉蕤蘭生莫可並。促席觴飛不計籌。子忽欣然忘渴病。  
於時諸公亦復樂。周郎狂笑兼痛嚼。何公頓喉作楚吟。  
浦叟持杯意沈著。陳生拜舞渾如癡。醉態頽唐差不惡。

勝友名花此夕偏眼看流水惜流年鸚鵡盃中春自暖  
鳳皇簫裏曲新傳絳蠟燒殘還更續半臂寒生銀漏促  
閒評花史憶當年昔人曾誌花榮辱今宵良會古所稀  
如此遭逢花亦足醉語花神慎莫嗔狂夫年年此時春  
模糊應來花下重相見倒盡松醪數百壺

香山有五年三月今朝盡之句戊子暮春許子九  
日感而擬和子亦效之

五年三月今朝盡竹塢無塵晝掩扉新曆驚心看再閏  
野禽聒耳喚催歸當窗草色誰爲主撲眼楊花何處飛  
春意漸回風正暖野夫愁殺換羅衣

偶爾

碩園詩稿

卷三

七

偶爾移居亦故鄉東邨十畝未全荒每憂世亂添詩禁  
漸恐家貧失酒狂人事暗驚魚陣變物情深笑鵲巢忙  
興亡五載何須問水美林香夢正長

殷子陟明有詠花詩十首人爭傳誦予猶未及見  
邨居長日戲擬爲之

仙骨如冰香霧邊參橫午夜夢虛懸朦朧月到光爲影  
黯淡雲來色是烟白雪吟時思謝燮青衣降處說羊權  
尋常樹樹攬春意銷盡紅顏倍可憐

綠萼梅

青瑤簪子紫荷巾寂寞湘魂意獨親秀出中庭同有樹  
芳生空谷迴無人桂英蓮實芝爲友石磴雲泉蕙結隣  
何事國香零落盡當門偏惹世人嗔

蘭花

綺閣文窗日未斜  
乍驚簾影剪輕霞  
紅妝此處偏宜醉  
燕子來時似到家  
映斷酒帘晴帶雨  
敲殘羯鼓夜生花  
曲江當日紅雲宴  
十里曾迎白鼻騮

杏花

極目深林烟月昏  
青田舊種到今存  
春城寒食家家雨  
野館孤燈夜夜魂  
風蝶採來應妬粉  
雪花飛盡欲消痕  
不堪小院重簾冷  
零落關情暗裏論

梨花

武陵一曲未應遙  
露葢風前醉眼撩  
洞鎖絳霞春寂寂  
澗飛紅雨影蕭蕭  
阮家偶笑終成妬  
漢殿無人只自嬌  
珍重許昌詩句好  
莫嫌輕薄意還饒

桃花

瓊葩珠樹望中寒  
却作麻姑仙掌看  
羣玉山頭雲氣亂  
鬱金堂內雪花殘  
數枝明月迷烟浦  
一塢清風泣露盤

### 碩園詩稿

#### 卷三

八

別種唐昌誇不到  
爭堪移植傍雕闌

迎春花俗名玉蘭

綺旒枝條分外低  
新婚應怨作梅妻

王元之海棠詩烟愁思舊夢雨泣怨

新婚又黎舉欲令梅聘海棠

絲絲濕雨紅樓夢  
剪刀輕風紫陌肯

燭低佞嬌悞病憑  
闌倚徙醉疑啼  
浣花閣筆休相笑  
浴罷華清是舊題

垂絲海棠

洛苑名高百卉叢  
春雲翠幙映瞳矐  
香生妙女全身相  
色借蟲娘半臂紅

牡丹花種有壽安紅

八面寶妝長自畫  
十圍步

障不曾風慈恩寺裏人  
爭道點綴誰先謝  
容工

牡丹花名始見

於謝康樂集

牡丹花

媽媽一色映山明  
芳意偏憐雨後晴  
化碧未成微有葉  
啼紅無力不聞聲  
臙脂夢冷魂千里  
蝴蝶春殘月四更

閨苑身歸當日事阿誰留恨錦官城

杜鵑花

江南春色正濃時鶴頂頑花發數枝瓣底渾疑勻荔頰  
梢頭還似墜楓脂乍迷白乳名難辨爭鬪紅妝態自奇  
梓澤若嫌金粉淡點將丹的總相宜

海紅花俗  
名山茶

### 邨居遣興

曳履南窗下悠然送鳥聲黃雲千頃暗綠雨一犁輕酒  
病當春劇詩魂入夢清向來感慨意耕讀足平生

### 晚舟即事

十里幽塘路無從問酒家斷橋虹作雨崩岸石移沙日  
脚寺鐘落山腰林火斜前途津驛近鄉語雜蘆笳

### 澄江永福蘭若與王宗衍夜話

碩園詩稿

卷三

九

未免浮名累途窮復此遊對茶僧意靜逢雨客心幽短  
榻劉琨夢孤燈王粲樓故鄉蒲艾酒共爾歎淹留

### 澣墅即事四首

古堞千年樹危關百尺梁峯懸銅闕影潮泛石湖光魚  
市白萍黑酒旗青苧黃鄉書看客寄目送夜歸航

山勢將潮影俱從此地銜波樓齊殿塔臯樹雜松杉間  
俗徵魚契分風擘鬻帆投繻追往事客淚一青衫

界堠遙分地由來足勝遊吳姬楊柳宅楚客木蘭舟夜  
月浮天鏡春花入畫樓可堪今夜戍笳吹咽寒流

百二雄名峙東吳勝獨偏地形爭楚越人語雜秦燕橙  
橘新編戶魚蝦舊放船征求今日事民力豈須全

碩園詩稿卷三終

碩園詩稿

卷三

十

碩園詩稿卷四 戊子下

估客

一望青雲氣雙艚百貨煩呼緡沽郢釀挾瑟調吳媛水  
送三州曲風飛四角幡江關頻詰問津吏語還諠

權女

家住橫塘舊盈盈十五年衫輕搖水色蛾小壓潭烟鬢  
釧蓮衣冷紫燒苧帶鮮青驄如可繫堪向錦帆眠

澄江感賦

百里征帆客路塵江城燈火識遺民連山荒塚飛殘雨  
背郭寒流截亂燐七十城猶新即墨三千客已舊春申  
興亡今昔無窮恨獨立蒼茫一水濱

碩園詩稿 卷四

呂節婦詩

瑟風肅歲暮庶草爭焜黃亭亭松柏枝孤根寧違陽武  
陵名家媛麗容暉璿房夙挺寒梅標濡翰騫清芳束髮  
事夫子禮義能自將卒爾邁迤愍鋒鏑罹英良音容痛  
潛翳弱體奮自戕紅梁雙燕子天池兩鴛鴦感物悲此  
別徒倚愁清芳蘭性本潔白冰心自堅剛斷指表夙懷  
皎節凌風霜一念永不渝黤黷回穹蒼俯仰殘悴姿默  
爲士節傷卓哉斯貞風千古終無忘

邨居雜興八首

結茅向東臬索居塵跡掃節候當蕭晨飛雨動碧草素  
心無氛埃流目及池沼水裔戲儵魚葭端啜鷗鳥物化

會有時返觀事幽討文史寄新賞明哲諒同抱芳蘭室  
內榮寒菊堂下好出處詎易量靜默聊自寶

晨興理盥櫛微吟閱殘暑夕暉下欄楹還思眺沙嶼意  
緒本玄漠所見都容與耕夫勸雲歸曾入隔烟語隆想  
自山林道心亦烏鼠中夜獨憐性回首念儔侶白日鄴  
里中紛紜究無緒蹠足脩篁間何如困行旅

仗策步平野悲來立躊躕盈目盡荒楚古人今安居前  
行軌路長屯平運何如日以冲散襟寢息茲園廬魯連  
好名節陶令耽詩書我愛張子房才爲興王儲談笑躡  
羸項更能留其餘赤松黃石儔人殊道同趨茫茫千古  
遙立風歸太虛

碩園詩稿

卷四

二

夙昔學堯老鷓鴣同我生胡爲籬落間乃有雞犬爭孤  
踪邈近古曠覽隨物情見山山亦高見水水亦清功勳  
不足慕寧知公與卿

葛花日以長柏葉日以短新人與舊人情好俱未斷涉  
川採留夷相遺達誠欵秦家有嬌女遇之陌桑擘珠襦  
垂藻翹行步一何緩途人見羅敷歸家但煩懣

仙人王子喬金庭以爲家朝餐青飢飯暮嚼琅玕花琅  
玕難結實空復乘雲車我欲從之遊隨風弄烟霞道遠  
不可到如何驂麈麕側身盼金庭搔首長咨嗟

竹生大夏西亭亭霜雪閱紛敷看電斑橘蠹挺烟節輝  
娟有餘蔭蔥青聊自悅春風盪園林百卉競森列陽陸

耀丹葩芳柯盈彩纈我行悲篋當偃仰何孤子物類與  
人情往往歎騷屑但秉勁秋心焉復計摧折

束髮美文翰天衢期攀躋歛吸迨少壯中原事金鞮窮  
途嗟渺默親故傷睽攜胸懷日惛勞投身竄荒蹊浮雲  
睨塵寰脫跡從幽棲君子道將隱放言安足稽感時傷  
逐鹿覽過羞懷駭耕鑿何地安拊心恒悲悽勗爾金閨  
彥努力康蒸藜

前打魚歌

晴川滌滌蒲芽小水膏可割紫鱗繞欵扉有客來草堂  
山膳隨營野菘少黃頭奚奴解捉解矯如獮獺臨清淵  
出沒波浪三五尺沈虎潛鹿皆拘攣乍驚衝岸躍不已

碩園詩稿

卷四

三

紫荇穿顛數十尾孟津三月事堪倫青鱖赤鯁相繼起  
眼看縮項與查頭一一依回就臞州可憐水國紛紜族  
不死清流死濁流座上倉皇索佩羹饗子刀披曳繭輕  
縷飛紅霞銀雪落冰厨快進蓮花鮓更炊麥蕈與土酥  
新壓燒春有百壺主賓盡效長鯨吸當筵還憶枯魚泣  
君子悲戕生達士論推移物性人情同大化躁者嬰禍  
靜者宜野人曠眼誰與比宇宙生息知無已仍向團焦  
放竹襟容散橋空看秋水

石民子倣可中家在東君成子存諸叔過飲草堂  
作

晴日了詩通相過半酒徒竹香黏袖澁花氣著簾甍鱗



雪批魚婢臍霜擘，蠲奴疎狂矜小阮。一醉卧青蕪。

偶步

秋水自然淡野雲，何意飛紅垂楓岸。冷黃割稻花肥雞，  
柵隨籬豎鷗莊。趁屋圍結廬堪傍，此十畝思依依。

後打魚歌

君不見祖龍椒宮毒淫撼，水濱河流逆上歎白雲。又不  
見河伯小史蛟潭夜，傳檄葛翁書到飛霹靂。只今清溪  
魚被屠，短舫飛來裝江罟。藻密沙圓波更急，網鯿還聞  
復引鱸。纖微却有箝筮過，長鬚君王尚不活。魴鯉難教  
慎出入，鮪鱓焉能思。眈眈漸見泥乾水澤空，巨鱗三尺  
尾先紅。千頭吹沫猶相聚，不道池中即釜中。吾聞古人  
碩園詩稿 卷四 四

蟋蟀詩 有序

予性夜寘，睡入秋彌甚。比荒郊獨卧，輒達曙無  
夢。一夕疲欲斲，斲就枕甫交睫，忽異響聒耳。遽

驚覺起，持燭跡東廂。蓋予牀面壁地，沮濕有蟋

蟀。古蟋 盤踞其下身，黑大聲，雄甚，每振翼高鳴。

則籬根牆角，堂坳窪間，其侶四起，而應音嘈嘈。

然唧唧然，予甚惡之。呼奴子鋤去，因坐索禿筆。

作蟋蟀詩得一百韻，體近俳調，意病冗複，且多

詈辭頗不足存越兩日錄示客客曰是非詈蟪  
蟀也子之意殆有所指耶其卞彬賦蛙韋琳表  
組之旨耶予笑不應竊以秋蟊唱愁本非惡聲  
依古詩人詞客自唐風以下無譏焉子因片晷  
躁擾遽製長篇便相訶詆使彼醜回蚤蝨毒甚  
蚊蟲定復何意或亦心存感慨語類庾詞聊自  
附古人寄託云爾

悶束丹鉛業窮詮蟲豸倫嚶嚶初見出蹶蹶漸看奔盧  
賦儀容古豳風氏族尊朔方呼蜻蚶南浦謚蚯蠖乾鵲  
稱須悞天雞疏却寃崔駟書感氣于寶記搜源迅翅聲  
名驟斑文項領繁響堪欺蚴蚽彩欲壓蠨蛸俗語丹砂

碩園詩稿

卷四

五

喻詩箋膠漆縑能歌羞巨螾不飲笑重蠹居並枯藜毒  
飛隨腐麥暄蝗身形詫小蚊食種疑蕃蝼緯名空壯投  
機智可昏癡蝸詔字畫荒崎藉經綸累迫蛇醫眷慙深  
鼠婦婚爪牙疑並倚羽翼悞無存漫識衣裘諺長舍雨  
露恩藏身看朽葦生計托蟠繫蕭寺聞絲管唐宮伴竹  
筭楚吟低聽鳩吳俗小當鷄博局豪家攫書階稚子掀  
莎髯芟古發蕉乳拔頽垣裂土求龍種圍場選虎賁辨  
聲知窟宅湍色得籬樊竊綠晴窗幙薦紅秋市幡草烟  
迷繡闥茗火活雲軒戲比三春劇人如七椀渾室中交  
疊屐戶外集駢輻贏滿爭持鋸曹分比擲韃魚弘財豈  
怯褚胤手誰援發指賓憑主權衡弟擬昆兵風真草木

關隘似崑崙脫兔離陶穴非熊鑿竹門環烟身踊躍超  
乘志騰騫鸚鵡纔開籠騶虞漫舉笱予交毛蝟磔稍擊  
膝鳴蹕皓首能先減蒼頭枝夙掄固陵山楚漢官渡水  
曹素蠶食矜時嚙狐疑怯偶噴浪蹄張猛虎輕咋失孤  
豚力健頭扛雀心輸腹露驪股傷歡共鬻髮鬢恨全髡  
蝨父讐難釋虬臣黨各庀殘旗螻蟻壘剩甲蝓蜣魂畏  
葛逡巡陣追龐咫尺輓局終紫斗撒睹罷綠腰翻斂子  
羞低芾加緋喜獲揆花評爭上下文榜辨魁元屢勝慳  
分地無功苦覆盆虛名軍授鉞怯影鬼聯輓雖使吹噓  
費難將豢養論久云囚土室粹爾叫雲閣爭勢難先蟻  
呼朋已後螿蓼汀風問訊梧井月更番魄耀螭頭蝕條

碩園詩稿

卷四

六

鳴龍尾蜿織筆當戶女斜瑟倚堂媛長信麟壺數昭陽  
鶴籥煩驚敲鑲扇獸疑撲瑣池鴛夜攪珠樓晝涼綃錦  
帳溫宮槐調側澁溝水割潺湲蕭殿延朝晷欵危引夕  
炬韻淒凋碧樹句促苑紅萱唱蛹埋烏燄吹蝮奪兔痕  
厨烟吹亂鼠驛雪課孤猿星破荒雞屋霜啼瘦犢棘林  
青鐘暗剗矻白浪高輪欲墮征鞍淚能寒客店樽椿催  
愁莫構築響痛無禪霧裊征人袂絲驚嬾婦援鶻悲僵  
岷峽竹苦裂湘沅暮雨過王粲春潮問屈原殘祠收薛  
荔饑鬼泣松檟亂石鳴還戛幽泉咽更汙蕭條居錦里  
寂寞卧文園忌藥拋書史銷塵賣甌甌硯荒文讓庾鐻  
冷髻先潘嘲晰紛鴉鵲鞭苔雜犉捷方嫌日溷感詎愛

夜呻喧慘矣懸低榻焦然困短衽始驚一燭冷忽急萬  
蟲言白馬攢從耳丹鴻唳自跟披衣聞滴漏推枕憶吹  
管枯筆題還榻殘爐撥更燔但吟形阻踈遽失目昏昏  
阮藉書猶記王褒論不諼參軍篇組繡僕射句璵璠氣  
力前賢借聲華昔彥敦叩頭身作倡逐臭甲同屯地冷  
難承竅年衰浪觸籓遷流傷輩壤放逐奪糜健行見威  
消日空言力轉坤乘權來帝女司節換天孫角逐情隨  
得呼號獄不反金錢推左藏玉食按餘飡躑躅誰營窟  
蒼黃尚乞墦投牀終勢失匿壁屢聲吞敢望灰釘斃應  
薰菁燭智淞凝身欲蕙露冷舌先捫一夜殘蘆管三秋  
老樹根來年深許怪還見汝沙邨

碩園詩稿

卷四

七

和東坡戒殺詩疊韻二首

人生畜食心畜苑人飲汁僂僂世多悞但圖枯吻濕烹  
噉恣鮮脂人身詎可得食心取相喻蟪蛄毒良急列圈  
豢羊豕重欄飼雞鴨不待年命衰皮毛入寓羃燒割比  
屠肆筋絡懸青赤方歡錦席時寧思荒醜白麕卵昧前  
誠歌呼岸巾幘我昔聞兔鬼邇更聞牛泣肉食有方便  
佛言周陷缺責償理莫逃天人報如客茲道華梵兼好  
生福咸集

蚊蚋嗜人膚如嗜鳥獸汁取喻雖非倫流血同淋濕鳥  
獸立能屠蚊蚋卧可得人爲百物靈戕物何太急海椒  
臞潛鱗蜀薑鴈寒鴨鸞刀手親捉調味還覆羃肉枌酒

爐旁貪饜性宜出何惜鮓脯甘王愛蒸肫白胡爲口腹  
貪往往在衣幘賦性夙不忍聞聲與見泣年三月六時  
淨脩誓無缺劬筭供饗殮市脯待賓客四生寃悉捐清  
涼味來集

病中自述四百六十字

病來無端倪病過無散卒來若遇風雨迷菅靡所悉稍  
愈舉體恬從容如脫桎痛定追前棕髣髴或有述衰秋  
發蕭蕭瑟居胸鬱壘宿氛倏相侵中情迫憂慄航貧罕  
遠謀纏疴卧柴簞粹然邁霖潦四壁響颺廳愁鴟叫蒼  
端屋角暗如漆頑莎滿東廂上漏下啾唧蛇鼠共茅棟  
跳嘯輕白日疲就籬笛眠疑乘波蕩滴寒宵自吟囈夢

碩園詩稿

卷四

八

意不敢實忽然神獨往心旌悅馳驛縹緲高山阿風與  
魂爲一疾呼聲不膺精爽莫可必妻孥唬匝牀昆弟坐  
繞膝競索玉函書爭訪長桑術倉皇問卜肆卜言半凶  
吉門前促迎神鼓笛聲聞溢老婦唱荒詞筵前設芬飴  
山鬼吹厨燈爨婢競奔逸傍徨俟中夜病夫氣稍出虛  
堂聞人聲如在數里率燭影青熒熒張口吐塵沕逡巡  
動生意奄殫尚旬日始同創瘡傷繼成羸瘵疾醫師議  
所投猶未及苓朮肌理漸疲黝手足屢寒溼脈亂滑溜  
滉形變忘枳橘躁同升木猱憂類投林猶輕身思鴻翔  
逃害慕鷲蹕舌焦生烟塵肉瘦遷蟻蝨十日絕饗殮三  
月不冠櫛漳濱卧非久茂陵渴豈匹徙倚藥爐邊眼前

惟亂帙俯仰百感紛展轉乃涉筆嗟此七尺軀屢遭造化嫉慷慨爲男兒稚節負奇質偶爾歸蒿蘆一生萬事畢所以君子戒營身貴周密太上防未然其次揀已失麴蘖誠宜調嗜慾併當室持身如執瓶疾疢烏由暱安用求良方遠叩靈蘭室明德慎養生此理古所休

秋村四首

貧病相依又送秋一年強半住村頭花名帝女能醫俗  
蟲號王孫解唱愁久閣紅籤妝瑋瑁暫拈碧酒浸蟬游  
途窮猶幸身無累免向金陵悔浪遊是歲子以賓興第  
二人竟不赴省試  
秋色平看郭外真蓼風葭露怯兼旬鴉喧金井翻紅葉  
鴨亂銀塘裹綠蘋無吏打門還弄筆有隣質酒便留賓

碩園詩稿

卷四

九

牽船補屋渾閒事晞髮叢篁笑古人

霜後魚鱗雲族頑  
樵花墜葉弄斑斑  
荻洲看月莎裳冷  
竹院關風薤簟閒  
日到庚申長欲守  
詩存丁卯半堪刪  
晚來卧聽鄰庵唄  
槐雨疎鐘出水灣

風露瓜棚月麥場  
晚秋排悶展青絳  
晴窗殘壘碁吳越  
小閣荒山畫晉唐  
齊物豈猶養生何用說  
嵇康

蕭條人事新看遍  
萬古銷沈倍可傷

舊雨

舊雨關心闔板扉  
城南花雪事多違  
潮田晚步堪驚眼  
雨兩鷓鴣各背飛

送咸大咸歸山陽二首

木落淮南潮亂飛周郎城下一沙磯須知吳市歌殘酒  
不異燕臺哭暮暉病後文章留我在夢中日月送君歸  
書生燕領從來事莫戀蓴鱸到處肥

秋老漳濱旅雁飛別山憶水漢魚磯解鞍林下聞寒笛  
問館碑陰記落暉劍冷人驕遊粵病筮殘家悞客秦歸  
中吳裘屨看應遍裘馬誰嫌輕與肥

病中大雲先生見過

久失西園會疑荒東郭墟歌塵誰壓酒病力可銷書一  
鵲連雲凍千峯待雨虛謝公相對處王令豈粗疎

病起酬諸公簡寄之作

一病連三月形疎意更親殘江秋欲別

甄玉時將有橫  
桐江之行

碩園詩稿卷四

雪句如神

甄玉舊遊楚有亂山橫  
雪線之句爲世所稱

門戶餘生累衣冠未

老身相思花下酒雒苑事還新

酬甄玉

蕭條佳節後病榻把萸房徑草含烟細簷花滴雨長風  
流看濁酒生計惜空囊更聽瀟湘雁知君共夜涼

酬荷

送楊學師北上

立亭春色乍相尋三策天人賦上林京國應傳新賜宴  
河汾猶憶舊聞琴馬嘶禁苑櫻桃熟羶冷空齋首藉深  
回首絳紗遺愛在雪堂風月幾年心

和揚州十七女郎張氏淚筆五首

琴心應未識求凰空記兒家白玉堂畫角聲中思舊事  
吹簫明月是家鄉

皂帕青衫細踏鞞琵琶斜抱獨長嗟霜笳一拍吹方遍  
白日黃河走黑沙

廣陵潮信自東流夢裏江聲淚不收榆塞春光看欲老  
故園青草見無由

落日黃雲薊北天蛾眉蕭颯自知憐埋魂青塚今朝事  
回首儂生十七年

馬上啼妝首重回蕭關土驛路頻催隋堤舊恨知多少  
零落瓊花那處栽

### 鴻門行

中原鹿走豪傑爭魯公沛公皆弟兄函關朝望龍虎氣  
居巢老翁心忽驚霸上新豐兩軍見椎牛置酒開新宴

碩園詩稿

卷四

十一

銀燭金盤座座寒巢笙摻鼓聲聲顫將軍上壽渴劍鳴  
肘後寶靶懸蘭纓玉峯照地雪花爛解來一舞悲風生  
別有英雄帳下起手掣吳鉤護天子筵前忽吼雙青龍  
楚人無色漢人死楯冠壯士來何在手排壘門立君旁  
眼光一文閃赤電起鬚橫刀噴大王玉玦屢舉玉斗碎  
老臣乞骸復何悔鴻門不爭爭鴻溝漢王從此不西退  
美人騅馬俱荒止陰陵夜夜啼鬪體季布丁公亦偶爾  
君看舞陽射陽同封侯

碩園詩稿卷四

終



碩園詩稿卷五 己丑

荷百約子鄧尉探梅以病不果行賦寄

舊夢羅浮漫許分青燈濁酒憶休文愁深錦里門長掩  
恨老紅樓笛未聞一夜厭聽窗外雨三年虛望隴頭雲  
蕭騷我亦悲雙髻思入新春併爲君

陸明可中過飲小齋得星字

漫漫春寒草色青虛廊屐響夢初醒才名許椽看誰敵  
意氣殷侯惜未冥千載漁樵眠栗里一樽風雨話蘭亭  
浮雲直北空回首海內何人問客星

壽麋涇叔父五十

湖海鍾靈異家門積慶綿宗邦期柱石里閉望神仙述

碩園詩稿 卷五

祖詩方讀趨庭訓早偏鳳毛看獨得駒齒怯誰前弱柳  
春園緝芳蘭秋浦攀吞沙函錦繡懷筆夢丹鉛經術推  
劉向文章並馬遷萬言驚宿學四世振家傳東國馳聲  
早南宮射策先出關終子歲入洛士衡年鷹隼搏風去  
鷗鵬負水還經綸儲五百禮樂侍三千時未知吾道天  
將老大賢風塵高汗涓車轍倦齊燕郭泰人倫重袁閔  
士節全名猶推鵠隱興已狎鷗眠健筆千秋史玄談九  
帶禪蘭亭追舊本輞水競新篇共羨梁鴻逸爭看薛鳳  
騫知非寧一載學易自三編梅萼香含冷桐華影露妍  
繡書小有洞問道左神天石髓炊青飯金莖裹紫烟笙  
歌傳法曲詞賦耀賓筵小子徒爲爾雄風何有焉生成

銜覆載嘘拂荷陶甄破浪羞宗慙焚囊惜謝玄詎云堪  
白雪漫自託青瑣盛德師規矩家聲賴仔肩南山今日  
酒聊爲祝華顛

柬子俶

衡門草色動青袍湖海襟懷許我曹中壘黃金因興到  
步兵綠酒爲名逃傷心長記銅駝恨溷俗何妨金馬高  
回首十年兄弟在可堪風雨共亭臯

無題

琵琶江上夢分明蘭畹新詞記小名帳熱春雲留枕印  
簟涼秋玉響釵聲不曾容易人千里無可思量月五更  
一自灞橋魂斷後幾年花雨倍關情

碩園詩稿

卷五

戲題

梅花吹動小檀霞薄薄春衫試夾紗獨下雲屏無片語  
背人偷摘海棠花

清明日掃墓

時是何王代邨猶吾祖墳衣冠前葉事生死舊君恩初  
色隨春老花光入暮昏園陵風雨在誰與弔精魂

邨莊即事

一徑空邨裏長林出草廬沙寒鷗起處莎細犢眠餘夜  
雨松花釀春潮柳葉魚蕭疎吾意得何地不樵漁

偶作

東郊景物盡芳新滿眼金堤柳麴塵風雨十年燈下事

鶯花三月夢中身短裘時典長因酒病榻多愁不爲春  
回首蕭蕭華髮在漢京詞賦語何人

坐雨

春事獨蕭森高齋此夜心蒲塘魚響急竹塢鳥聲沈一  
雨無新舊千杯斷古今何時看白日晶晶音破窮陰

虞山道中

五載曾遊處重來似故鄉風烟迎小艇花月近橫塘水  
市鱸羹賤山田雀麥荒東林禪誦地落日正蒼蒼

桃源澗

遊到難窮境翻疑昔未曾借峯吹宿雨隨壑散層冰林  
日酣羣鳥山雲淡一僧松聲同響梵入耳總難憑

碩園詩稿

卷五

三

破山寺訪牧雲師不遇

香阜遙分際烟蘿轉石盤龍依趺座古雲入講堂寬  
火明平野溪光冷暮難支公憩何處寂寞筍輿看

同陟明子俶九日餞送荷百赴幕得鄉字

羌笛離亭送夕陽短裘羸馬急軍裝陳琳筆健身猶壯  
庾信才多意獨傷倚劍一城邊氣紫飛書千舶海雲黃  
登樓莫向旄頭望明月銅駝是故鄉

病中感舊二首

虛齋一榻靜如禪忽憶當年罷綺筵風細月明人半醉  
笛聲吹出小樓前

文園春盡奈情多筍候花時夢裏過依舊年年三四月

石林寒雨病維摩

霜哺篇爲袁生賦

匹鳥翔東南雌單良所悲淒焉齊女門精魂隨陽夷朱  
顏凋瓊鞋絲泪垂空帷呱呱盈室中堂上聞噢咿嘔煖  
百手口種德啓令嗣持躬慎金城夙夜仰訓慈匪無艱  
版勞靡盡銜恩私清芳並嘉尚晞古良可期我懷魯陶  
嬰濡翰攄新詞高節邈難競心理祇自知何以表劬瘁  
翹首瞻鷺斯

題壁

青衫落魄恨無成捫却頭顱屢自驚萬卷不如三尺劍  
莫嫌花酒悞生平

碩園詩稿 卷五

四

同九日夜宿子倣齋

一雨自然秋虛堂靜夜留燈清烟帳細花煖露牀幽夢  
入三年事杯沈萬古愁別情何處是明日送孤舟

時子倣齋

以次日之浙

送子倣同梅邨先生之浙兼東甄玉

蠟屐追陪謝傅行異鄉風物總含情愁來南國花春發  
夢入西陵水夜生江上仙舟看李郭杯中名酒號烏程  
嚴州書記如相問爲道疎狂舊姓名

次韻贈許翁五十

玉笛梅花下揆初共慶年鄉評潛愈重世德亂終全綠  
髮千春後青山一杖前浮雲獨對處應解息塵緣

徐鶴心來妻偕九日見訪不值解棹去

芳草天涯思未殘，剡溪春水到門寒。  
三年書信虛殷羨，百里交情悞呂安。  
空館荒烟侵几榻，孤帆細雨濕闌干。  
相逢知有龍山約，好向秋風笑正冠。

鶴心約九日以重陽節到崑

偶東九日

一月無詩句，愁多懶對君。  
情非今昔雨，跡似往來雲。  
花絮飛殘，夢池塘，映夕曛。  
新篇推俊逸，還憶鮑參軍。

池上

獨立方塘晚，水紋如篔簹。  
烟輕雷微雨，後乍暖，側寒天。  
荷氣含風，靜魚身出浪，圓向來。  
花酒意對此，一茫然。

小憩

碩園詩稿 卷五

五

小憩成幽隱，無人自掩扉。  
茶香侵蕙幌，墨雨暗蕉衣。  
石磴雲生細，花牆日上微。  
草堂風景似回首，思空違。

吳門雜感二首

吳閶初色帶斜曛，十里潮田路細分。  
金碧乍題新寺篆，松杉猶隱舊碑文。  
崩沙亂石亡王殿，綠水紅花少女墳。  
閒倚高樓添客思，風前一笛鎖寒雲。

黃鸝巷口酒旗又重到，長干小婦家坐向。  
露牀銀燭冷點來，雨筆錦箋斜。  
碧廊似識曾遊客，紅藥初開舊種花。  
回首昔年歌酒事，空庭明月不勝嗟。

晚泊偶成

小泊孤灘急，輕舟試採蘋。  
樹高烏鵲喜，樓近綺羅親。  
江

月初如火山雲乍似人新詩徐詠處碧水自粼粼

懷子佩

忽憶河梁上蕭然幙被攜一樽吳地雨雙屐越山泥隴  
水江闊雜邨花野郭低嚴灘風月主可入近詩題

遊仙詩四首

綠輶齊駕倚蘭風來往雲林下泊宮太極仙人吹笛響  
元洲長史寫碑工海霞九色瑤壇紫澗雪三聲玉鼎紅  
莫道立都曾不到青城東北是崆峒

蓬萊窈眇路參差來到仙家總不知麟脯擘殘因使酒  
龍肝賭盡爲貪棋無邊木石人間恨有限星橋海上期  
一曲雲華纜唱後還留清夢惱瑤池

碩園詩稿

卷五

六

虹丹月醴昔曾分洞府重繙十賚文白鶴口呼橋下雪  
碧騾蹄落嶺頭雲琅函藥笈空中讀玉磬瑤笙海上聞  
曾記璇宮秋漢冷素娥宵織翠霞裙

長向朱陵事鍊脩琉璃度幾陰幽篆飛蛇月三天暮  
劍聚龍雲一水秋玉斧新班還有待靈籟舊侶本無愁  
茫茫滄海塵何盡空望層城十二樓

隔牆聞歌音四首

小院經時暑雨頻露牀斜倚岸烏巾誰將白苧新翻調  
愁殺文園病裏身

箏語織纖半未和高樓簾捲動池波銀鞍柘彈誰家子  
應向樽前笑綺羅

園鎖初開石徑斜空庭猶記折榴花可憐絲管紛紛處  
不是西鄰舊宋家

牆外爲雜資園  
予舊讀書處

當筵我亦寫新詞愁病年來苦不支豔曲無聲人更杳  
閒將紅豆打鸞兒

### 送陸明之練川

璆珍柳色暗征衣夾岸潮田一棹飛極目澄江如練處  
何時重對謝玄暉

### 陶庵先生遺集歌

錢塘水腥崖山冷野老血書埋廢井祥興鐵匣開模糊  
撫卷滄浪淚如縷吾今亦閱冰霜詞寒雲石硯流清澗  
一往筆墨裹真性作之者誰百世師江夏人宗稱卓犖

### 碩園詩稿

#### 卷五

七

夙昔胸中墳五嶽栗里時傳處士名青溪舊本先生學  
中年射策向皇州隨返澄江卧碧流粹爾烽塵動江左  
環堙鐵騎孤城愁義軍已灑平陵血上谷悲風天地裂  
故人知我定相從珍重生平從此訣日暮寒星墮郭門  
空壕烏雀亂黃昏蒼茫自寫孤臣字慘淡誰招野寺魂  
回首春秋俄幾度錦江弟子今如故篋裏還珍魯郡書  
馬前空拜江都墓收藏更剩舊青編縱有侯芭不敢傳  
墨渝紙敝留遺詠持比燕臺吟嘯篇元氣上千真宰惻  
天遣蛟龍陰衛翼應共丹碑翠碣垂不隨土暈銅花蝕  
捧看真本是烏絲鐵骨冰心盡在茲不見其人誦其句  
此身如在先生時先生大節今誰覩兩言堪作一生譜

八代文章變古今百年正氣還君父君不見剡溪紙價  
當年新宗伯文章江東珍偶然名行汙牙齒一時千載  
俱灰塵

苦雨二十八韻

好懷無此日霖潦轉愁予靈景光長蔽層霄氣屢噓電  
壺驚玉女潮血怒黃魚霞脚明還晦雲根密未疎泉深  
滋綠草露冷觸紅蕖澹瀨沙喧候崩岸塌塌餘霏霏吹  
暗樹汨汨注寒渠敗葦青荒砌頑莎碧綺疏波隨鷺起  
處風似鸛鳴初竈濕難炊黍園荒懶摘蔬小庭吹蚓曲  
殘壁上蝸書癭節爐香潤瘤尊酒意虛竹烟侵几案蘚  
氣落巾裾張協愁難盡江淹苦不除惟聞嗟破塊豈等  
碩園詩稿

卷五

八

駭隨車去歲禾仍好今春田未畚人情看若此天意果  
何歟世事兵荒會吾生涕淚儲幾年傷庾信今日病相  
如累月身多卧經時髻廢梳道窮拋筆墨計拙賣田廬  
門戶增新痛衣冠感故墟半生消藥餌萬事寄樵漁寂  
寞仍親舊蕭條獨并閭無才憎運命多難忽居諸湖海  
情空在乾坤恨莫攄撫衷偏浩渺對景自歛歔安得陰  
霾圻重瞻白日舒

讀端士燕遊草感贈

長安裘馬一時新冰雪鬚眉倍苦辛燕市荒臺歌碧草  
薊門殘月慟黃塵三千里外重來日二十旬中半老身  
雲樹蒼江遊子恨故鄉消息未全真



感興

蓬門寒雨夜如何憔悴青衫泪不磨  
一頃田荒家落莫三年髻老事蹉跎  
行藏未定身應賤歌哭無端恨轉多  
烽火接天難寄夢故人星色更山河

夏日齋居十首

槐院風高梅雨黃蜻蜓飛處亂蘋香  
烏紗白恰無他事小几平鋪檢藥方

連宵河朔會相催此夕空階獨舉杯  
浴罷單衫新月下冰盤初進紫楊梅

蒲風蘭氣惹輕綃回首荒園綠水橋  
多少石欄逃暑地

舊題詩句在芭蕉

碩園詩稿 卷五

九

殘卷初拋白醉餘輕籠解散

王儉  
署名

意狂疎愁心何必因

霜髻短髻新來不要梳

綠野黃雲一望空盲風怪雨數旬中  
今朝未滿三農望

渴日纔窺半壁紅

四面柔桑護短軒幽禽相對學人言  
綠陰寂寂攤書好

只恐催租吏打門

殘榴如火照闌干薤簟冰壺未覺寒  
却憶東邨茅屋下

清溪一曲萬琅玕

書窗午夢雨如塵碧沼紅花影尚新  
往事十年何處問

偶拈團扇轉愁人

靜掩蕭齋暑氣輕火山五月憶歸程  
浙江船上離家客

知聽新蟬第幾聲

時子做  
在浙

銷夏今來別有天  
風杉露槿雜鳴泉  
碧旗碾試紅莎罷  
獨坐長參飽飯禪

汪昭茲見示新什走筆答贈

握手風塵意已傾  
更投明月入懷驚  
青雲江左才偏儁  
白雪湘中句自清  
莫道交遊原再世  
須知筆墨本三生  
年來蹤跡慚疎放  
空憶汪倫此日情

贈陸翼王

望族推吳郡英聲  
起建安高懷方白雪  
孤節映明珥史  
匠稱無忝經神譽  
不刊度如波浩蕩  
品並壁巒屹正氣  
留眉髮清泉照肺  
肝一生聞道早十載  
立孤難慘淡婁

碩園詩稿

卷五

十

江暗蒼茫練水寒  
精靈仍宇宙存沒  
各衣冠桓典悲何  
盡胡騰力自殫  
無文投屈子有恨  
哭燕丹玄塚心遙  
拜平陵淡暗彈姓名  
逃市肆魂魄弔江  
干禍福由來定艱  
危舉世看命窮身  
更苦才老行彌完  
鳳隱高棲食鴻飛  
惜羽翰蔽薇商叟  
志冰雪漢臣餐舊  
業留燈火餘生許  
釣竿彩猶遲豹變  
澤已待龍蟠日月  
雙眸倦闕河半鬢  
殘蘭風吹欲歇梅  
雨滴還酸客館三  
年夢清樽一夜歡  
笙簧慚統苑旗鼓  
怯文壇把臂欣逢  
李傾心幸識韓千  
秋吾黨在回首莫  
長歎

醉歌行贈汪昭茲

人生快事在天壤  
痛飲狂吟稱儼儼  
丈夫雙眼何時青

不屬古人屬吾黨邇來星色纏東吳相逢慎莫嗔頭顱  
男兒二十不得志阿誰喚取眠菰蘆自慚鳳背兼麟角  
多君能擅淵源學萬言詞翰走蛟龍一代風流比鴻鶴  
當今意氣知誰高交君真如飲醇醪玉缸倒盡春風下  
千杯寧復醉醅醕眼看海上赤霞起雲夢胸中八九是  
安能飛身天表作長虹疾吸秋江千尺水吁嗟乎廣武  
英雄空山河胸中短劍頻摩挲試看樽前有酒搖金波  
王生起舞汪生歌

季夏諸同人集王子鴻調梅花草堂得魚字

小築此幽居羣來問字車從時常氣盡論古自心虛  
陰消殘酒荷聲落小魚立文相賞處斜日下庭除

碩園詩稿

卷五

十一

古意四首

堂址女蘿草堂前菖蒲花郎心應蕩子妾意豈倡家  
妾爲園中花郎是陌上柳不及春風時相逢但垂首  
落日放輕舟採蓮向南浦蓮葉自田田儂心蓮子苦  
可憐十五女猶未嫁王昌雄蜂雌蜺好不敢效鴛鴦

陳明可中齋中小集得風字

盤飧草草幸相同十載論交氣自雄戶外草烟新舊雨  
窗間樹色去來風心懸日月身空老道在文章命已窮  
殘酒不消今夕淚人生原合寄愁中

夜坐偶憶三首

蘭房曲曲對菱銅倦繡曾窺半額紅今日昔年同是恨

兩般明月一般風

青衫留得汨絲絲畫舫風烟畫閣詩不信紅筵當日酒  
此身曾作杜分司

幾處閒愁夢不成只緣愁絕轉無情虛堂木榻燈前雨  
十載依然一髮僧

子做浙歸借可中過訪小飲時六月晦日酉刻立  
秋各賦二律

玄亭重到拂烟蘿落日平橋徑再過綠酒生涯吾黨舊  
青山詩卷異鄉多羅衫暑退天初夜團扇涼生水自波  
遲爾故園秋色在錢塘潮信近如何

天末遙驚一葉吹菰城新釀喜盈卮銀河星淡秋方動  
碩園詩稿 卷五 十一

金井風微客未知十里鶯花梁苑賦半生愁病杜陵詩  
河梁話別今宵似轉憶登程立夏時

題西冷閨詠四首次韻爲吳巖子卜立文賦

望湖樓曲大堤斜淑媛風神本靜嘉書格曾聞驕衛女  
詩心堪許壓蘇家紅泥窗冷迷殘雨青粉牆高怨落花  
自悔尋春狂杜牧錢塘門外不停車

清溪一望滿紅葉遙憶仙人住碧虛魚鑰聲寒宵試茗  
蠶房香煖晝抄書已垂楊柳絲無盡未倚蒹葭玉不如  
靜女只堪高士比風流合喚卜田居

吹簫看奏鳳將雛繡纈輕衫映玉膚明鏡懶臨梳開掃  
小釵閒擲賭樗蒲金針舊度鴛鴦譜彩筆新翻蛺蝶圖

咫尺蓬山誰許到海潮無信寄麻姑  
碧城十二共棲鸞筆柱無聲凍不彈浴硯眼窺鸚鵡細  
薰香斑試鷓鴣寒夾窗花鳥屏間見入座湖山畫裏看  
遙憶六橋明月畔秋風今夜幾闌干

吳門即事有感

夾道征南鼓吹還駢弓白馬氣翩翩將軍舊領平羌節  
使者新監下瀨船雲暗銅梁迷障塞月沈珠浦散烽烟  
旌樓十里吳閶道野老傷心記昔年

虎丘同吳門梁溪諸子社集

蕭瑟空山亂夕曛招提青靄護氤氳鐘聲入石禪心定  
劍影歸潭霸氣分鄴苑樓臺才子賦梁園松竹大丈夫  
碩園詩稿卷五  
千秋此夜同遊賞莫忘江東日暮雲

三

書事

秋老龍庭草木腥北來鴻雁語堪聽防關上將辭天闕  
都水中郎接地形萬騎弓刀秦塞紫二陵風雨晉山青  
繁華江左今依舊且倚南樓望歲星

感秋八首

卧病漳江節候逢不堪湖海寄遊踪清秋朔雁人千里  
故國南雲路萬重白日江風吹薜荔青天山色照芙蓉  
乾坤入眼情何限西北高樓接戰烽  
朔漠哀笳遍野吹漢家遺業重堪思千門月色銅龍咽  
雙闕鐘聲鐵鳳悲甲第樓臺低柳市離宮花草暗蘭池

百年回首興亡地只有秋風似昔時

秦晉江山百戰餘  
薊門消息近何如  
憑城重發三河校  
築岸新開六輔渠  
天上邊關分虎豹  
海濱日月混龍魚  
最憐世事銷雙鬢  
長嘯江頭一草廬

江南雲物九秋新  
萬戶風高閭闔塵  
波蕩滄溟翻鳥嶼  
天迴碣石動星辰  
弓刀朔雪黃龍府  
禾黍西風白馬津  
落日漁樵悲不盡  
汀花渚草獨傷神

萬里黃河日夜奔  
十年征戰昔乾坤  
殿分鷓列衣冠異  
關繞龍城草木昏  
長主外家平樂館  
小侯新第奉明園  
西來一騎秋風急  
依舊葡萄入玉門

朔方八月草斑斑  
沙白榆黃接漢關  
馬上胭脂歌出塞

碩園詩稿

卷五

十四

笛中楊柳奏平蠻  
早朝貂錦花邊出  
夜獵駝羊雪下還  
文學使車重到處  
長安直北望天山

千艘萬騎在尋陽  
白羽秋間老護羌  
馬過陰山春有雪  
戈迴瘴海夜無霜  
五陵子弟調鷹健  
六郡材官射虎強  
幕府日西歌舞在  
將軍油旆赴球場

風塵天地一漁舟  
澤國山河恨未休  
勾踐廢城黃葉路  
闔閭遺廟白蘋洲  
重陽雨色衝蕭寺  
八月潮聲走庾樓  
極目五湖秋思遠  
銅駝芳草不勝愁

九日感懷

露菊霜萸次第開  
清秋寒節重徘徊  
風高鳳嶺停歌吹  
日暗龍山倦酒杯  
萬里關河空北望  
一江鴻雁正南來

不堪短髮頻回首烟草前朝戲馬臺

同子俶小飲城南即事戲作四首

陌上閒情惱使君怪來妝閣笑聲聞含嬌有意頻窺客  
翡翠屏間出茜裙

簷前疎箔映高梧錦瑟旁邊是酒鑪自倚家門非碧玉  
不嫌名字近紅珠

鷓啼金井月三更小焰缸花映壁明公子王珂頻貰酒  
佳人銀甲作彈箏

輕寒誰借紫襜褕酒冷香銷客思孤惆悵不須煩司馬  
紅顏原愛嫁狂夫

次日徐子鶴心貽詩相嘲走筆答之二首

碩園詩稿

卷五

五

禪榻茶烟夢暗驚何曾杜牧有三生春風玉勒尋常事  
愁殺章臺記姓名

十年荷鍤舊生涯北里風光未許賒自是藤溪流水隔  
莫將輕薄怨桃花

鶴心兩次訪子不遇  
來詩頗以爲恨故云

甄玉浙歸同子俶九日過飲

不見桐廬客於今復幾時風霜仍舊色歌哭自新詩

甄玉

時有亡弟之痛塞雁三秋恨江潮八月悲清樽同細雨斟酌慰  
相思

東城晚步

汨汨寒渠急蒼蒼野日昏荒田微有路古廟半無門風  
黑催鷓影潮清出樹痕幽人宅何處城市一山林

哭姊詩四首

憶失慈親日零丁姊獨知何期今哭姊還似母亡時綠  
髮生前恨青楓死後悲楚魂招不得和血寫哀詩  
蕭條貧不厭寂寞病長航地下應難問人間更不堪精  
魂隨野鶴心力盡春蠶留得呱呱子思親尚未諳  
疾病纏三載家門賴一身寫經因薦母脫珥爲留寶巾  
憫風何邁齏鹽味自眞傷心遺挂在可解慟安仁  
言笑思猶在音容訣已非十年愁裏過兩月夢中歸暗  
雨欺空閣孤燈壓素幃眼看鴻影斷無語哭斜暉

歲暮

柴門風雪未嫌貧卒歲新裁白纒巾牆角凍梅吹漠漠  
碩園詩稿 卷五  
六  
蒼牙乾雀啅頻頻眼中盜賊干戈事夢裏衣冠禮樂身  
落日蕭條天際望暮雲寒色大江濱



碩園詩稿卷六 庚寅

早春

早春景物漸芳妍  
短鬢臨風思惘然  
白雁黃雲迷故國  
邊聲海色動新年  
愁深賴有平原酒  
命薄漸無好畷田  
入眼傷心舊時事  
滿郊烟草又芊芊

吳淞道中

到海更停橈  
孤城霸氣銷  
魚龍吞日月  
笳鼓截雲霄  
雁語三更夢  
雞聲半夜潮  
風塵何慘淡  
搔首愧蓬飄

閨怨

心事到黃昏  
羞和女伴論  
杜鵑前世恨  
楊柳隔年魂  
舊夢空流水  
新知是淚痕  
樓東芳草路  
前日去王孫

碩園詩稿卷六

邨居雜賦十首

小築非無意  
吾生寄此中  
短眠船底月  
橫唱笛邊風  
谿水肥新綠  
邨花活晚紅  
家家桑柘好  
樂事總相同  
野性隨時愜  
閒身到處宜  
百弓苗穉稔  
半畝竹籬蓰  
芋粟芽初茁  
葵松甲自滋  
側身天地內  
雨露感恩私  
地僻宜僧舍  
齋空似驛亭  
豆畦飛蛺蝶  
藤桁立蜻蜒  
拂研評詩史  
當軒註酒經  
晚來吟嘯處  
企足北窗檉  
柳夾方塘密  
花圍古屋低  
荒田松炬火  
濕岸筍鞋泥  
草冷侵三徑  
雲深護一犁  
蓬門身掃罷  
閒聽北隣雞  
稍覺藏書少  
休嫌種秫多  
驢聲沿破店  
牛跡印荒陂  
澗細泉鳴急  
林寬鳥語和  
長安鳳皇曲  
堪付小僮歌

猶是春歸候人閒畫較長  
梁來嬌燕紫簷墮小梅黃  
睡醒敲茶白吟殘坐石牀  
十年身世事回首淚浪浪  
栗里人長在藤溪棹不遙  
日高鳩婦喜風淺雉媒驕  
鼓笛邨中社魚蝦巷口潮  
南隣好酒伴共許醉深宵  
茆舍無人到圖書祇自娛  
拆籬三寸笋趁浪一雙鳧  
泉石情多少鶯花恨有無  
眼前堪傲世十畝未全蕪  
極目滄江遠孤吟亦自豪  
水清移罽畧日煖換祇凋櫻  
實芽芽熟荷擎冉冉高  
閒尋弔古地荒塚亂紅蒿  
采屋愁無暇畲田力僅存  
育風穿壁脚猛雨沒籬根  
戶戶祠蠶母邨邨養稻孫  
征輸新更急野哭遍黃昏

臨洮銅人歌

偶閱二輔黃圖有感漫作

碩園詩稿

卷六

二

秦王初築朝宮居炎行騎士  
漿行車隴西忽見巨人跡  
銷銅重鑄長身軀背上二十六年字  
李斯刻篆蒙恬書  
世事滄桑自今古驪山慘淡沙邱苦  
青槐綠水俱埃塵  
露閣雲窗並灰土秦家不樂漢家樂  
茂陵松柏亦如許  
別有仙人承露盤清泪如鉛咽  
秋雨苔侵蘚蝕不知年  
幾見空臺鸛鵲烟董逃一曲唱不了  
銅馬飛廉并鑄錢  
鑄錢未盡留殘跡永平載向長安陌  
雒陽門裏不堪容  
濕燐荒草埋寒碧我披逸史悲興亡  
况遊阿城甬道旁  
玉階金輦已寂寂吳宮晉代還茫茫  
猶憶漢王禪新室  
長樂淒涼鬼夜泣夢裏銅人慘不言  
野火西風吹起立  
王莽董卓空悠悠銅人遺像埋荒坵  
蘭州城下洮河水

至今千載長東流

後邨居雜賦十首

佳節宜新夏移居恰此時簷低催日帽窗煖護風絲曬  
藥還呼婢尋書乍遣兒眼前無別事欲續草堂詩

此地宜高卧聊隨性所安數禽呼晚樹一杵落晴灘槐  
火風前緩苔花雨後乾時聞說城市驚起夢邯鄲

寂寞無功宅蕭條元亮家紅梁開舊墜碧乳試新茶雨  
細榆猶夾烟輕柳未花喜聽耕種暇屋角響繰車

農事忙中過詩懷靜裏知寒生花匠怯病益酒兵疲時  
嘯王猷野長眠山簡池滄洲殊道遠只此任棲遲

客已虛金谷吾猶愛輞川薛深塵鹿跡沙淨鷺鷁烟按  
碩園詩稿

卷六

三

曲按紅豆題書做碧牋狂來白眼看車馬過門前  
物候時時好九欣四月初麥青平覆雉萍綠穩藏魚戶  
內除繁草亭前摘小蔬偶然乘興出牛角掛殘書

樹暗堂疑暮池涼簟似秋喜晴看麥脚占雨忌禾頭瓶  
汲桐陰井碁敲竹裏樓一廬人事了吟咏足蝸牛

已負團茅志猶餘抱甕情三山尋鶴夢一水問鷗盟土  
屋炊烟薄雲庵梵磬清風塵渾不到何處說浮名

偃息南軒下幽懷次第開風添丁字水雨送卯時雷蘭  
氣侵烟幌荷香入露杯隣翁能種植還與乞花栽

獨坐空林暮愴然思不凡殘年看短劍薄業問長鑱屏  
跡還消病逃名亦避讒浮生堪此過不用泣青衫

奉贈大傅敦武杜公二首

高牙八面動星茫，玉璫雙擎向射堂。白馬十年衝朔雪，  
紅旗萬里捲蠻霜。天留舊德中原老，帝冊元勳異姓王。  
武庫家聲今更壯，風流不數晉當陽。

嫖姚名望滿皇州，家世金貂四葉留。渭北風高秋試劍，  
江東花暖晝登樓。新成詩句題山嶽，舊賜征袍繡斗牛。  
試問令公麟閣事，馬前執戟盡封侯。

同子叔荷百訪梅邨先生虎邱二首

爲有幽人在，披尋跡屢深。岫雲無定意，谿水自然心。古  
渡明僧影，斜暉淡客襟。行行短簿廟，十里即山陰。

車馬亦山家，開門客不譁。廊青晴見荔，祠黑午驚鴉。樹

碩園詩稿

卷六

四

色松龕火，泉深竹院茶。相過不厭數，隨意岸烏紗。

次日梅邨先生偕周沈二子同集虛受劉翁園亭

即事二首

一雨座無言，相攜得小軒。共知文字樂，祇覺主賓煩。窗  
色憐蕉葉，盃光愛竹根。紅牋爭擘畫，風景憶梁園。

此會稱難得，須知意各傾。銀絲翻脆餅，玉筋點香羹。暑  
欲消吟興，風能助酒情。詩人誇老健，談筆劇縱橫。

贈章素文

風流十載舊班揚，詞社翩翩最擅場。筆下蛟龍飛茂苑，  
花時車馬動金閭。吳山浙水名俱遠，酒聖詩神興獨狂。  
長嘯披襟吾黨在，幾回清夢托滄浪。

贈宋旣庭

蒹葭幽思隔年留  
琴酒追歡此日遊  
江左不堪重作賦  
宋家原合易悲秋  
閒階碧草羊求徑  
落日清江李郭舟  
回首吳閶天際夢  
文章遙識鳳皇樓

贈章湘御

秋水丰神玉樹姿  
才名還許笑僧彌  
風香楊柳飄書幌  
露濕芙蓉映墨池  
北海酒杯天下士  
西堂花草一門詩  
懸知年少青雲器  
不數終軍二十時

問松限心字友人索賦

嶽色河聲萬壑陰  
誰將白水舊盟尋  
鸞皇得幹音方振  
霄漢無柯意欲侵  
蟠盡虬龍千載氣  
戰餘風雪百年心  
碩園詩稿 卷六 五

寒梅老竹相期否  
獨立空山自古今

五君詠

失序

周子倬肇

周生天下士  
斯世觀實難  
意氣翥赤霄  
奇彩揚神鸞  
絳卷夙自怡  
匠心乃濡翰  
文筆準昌黎  
詩律擬建安  
放曠延邈眇  
沈冥標達觀  
醒醉各有寄  
歌哭非無端  
靈芝白玉瑛  
大藥黃金丹  
遐舉以為期  
日餌蒹葭飡  
浮雲自明晦  
時俗輕譏彈  
願言保堅貞  
贈子青琅玕

許九日旭

許尹冲散徒  
稭節多英奇  
淒飈起玄朔  
歲暮挺寒蕤  
孤懷自位置  
獨撫喬松枝  
時發瑤華音  
嘉藻驚紛披  
駢羅

富心胸吟灑攄鴻詞幽討真宰讐冥搜神鬼師形骸委  
土木情性耽蓬茨相如病瘠首子雲苦貧饑蛇蟄終殘  
年惜此鸞鵠姿牽手春風前相慰毋憂思

郁計登禾

黎陽負偉幹卓然時彥雄嘉篇潤金釀瑶響搖玄穹慷  
慨慕疇昔遐睨青雲中矚矚自侗儻俯仰羞雷同晞古  
志彌上規世道亦隆赤驥竚騰驤神龍會飛翬睠言二  
三子勗德期相終企爾登天衢奮翮驚羣公時俗既混  
淆何以颺高風天末起赤霞矯首瞻崆峒

周孝威雲駿

汝南洵人傑令弟更罕儔鱗缺星爲鐔利器雙吳鈎雅  
碩園詩稿

卷六

六

抱竿奇才自命經世流苔苔播高藻歷歷揚清猷逸辨  
欲生悟諧喙能紓愁睥睨或賦俗澹寂非鮮謀白眼誰  
氏子胡越空悠悠羨爾凌雲襟恥受塵鞅留去途無迴  
驂逝水無還洲勗茲歲寒心文史同千秋

王鴻調時泰

軒軒太原子芳聲振空谷弱冠事縑蒲百奇貯心腹作  
賦思茂陵較書擬天祿見道本超越接物亦清肅高節  
懷山椒逸興寄林麓玉樹自森爽瑶草洵芬馥鳳凰有  
神姿疇曰爭鷄鶩九陌多風塵紛紜日馳逐感愛同鷓  
原此意良所獨高吟開北窗與君酌醪醪

白門余澹心來婁同昭芑子倣九日聖符周臣端

士異公集梅邨先生梅花庵

鄴下翩翩會勝流平原杯酒共淹留  
高歌明月人誰壯芳草浮雲意自愁  
震澤烟波千頃暮秣陵花雨六朝秋  
江南牢落無窮恨欲付樽前一笛收

中秋夜子俶九日孝威鴻調集齋中

千秋明月此銜杯江左羣賢亦壯哉  
海國魚龍空變化天街星斗鬱崔嵬  
劉琨嘯自城頭出謝朓詩從嶺上來  
夜半簫聲何處客漫教人憶鳳皇臺

方話白門舊事

懷黃庭表

荒原野色照柴門幾度青苔隔屐痕  
枯樹賦成銷白晝寒蟲吟就失黃昏  
三秋風雨文園病八月波濤楚客魂

碩園詩稿

卷六

七

遙望海雲東起處滿溪紅葉一沙邨

吳梅邨先生席招同蔣太史虎臣徐中翰子星徐文學州來即事

青樽白苧暫時同千載登臨屬謝公  
銀燭乍搖花底月玉珂徐動柳邊風  
西園劍佩青雲裏北海星辰紫氣中  
邂逅綺筵休惜醉古來才子本江東

懷杜九高

雙鯉迢遙隔幾時萬家秋色各天涯  
草生南浦人歸晚潮落西陵雁渡遲  
百里關山吳越夢十年風雨弟兄詩  
柳雲汀樹無消息極目高原有所思

送庭表之浙

蕭蕭書劍上江船兩岸青楓客路前  
吾道滄洲空歲月浮名天地一詩篇  
霜高茗水芙蓉老露冷嚴灘橘柚圓  
回首海虞添昨恨故人分手各風烟

時子傲  
在虞山

同立炤兄次谷弟過楊金吾宅看菊小飲

良會隨時有名花似此稀金鈿俱列座  
繡幄更重圍迥欲欺紅袖偏宜向白衣  
蓴鱸思正劇稻蟹味方肥清酒月相照  
高歌雲不飛西園芳宴好殘夜已忘歸

同爾公賓侯楊貢計登顯弱孝威鶴心孚文家次

谷集子吉園亭即事

芳園風物自清幽珍重王孫此日留  
公瑾情多頻顧曲仲宣秋老倦登樓  
東山絲管同新賞南浦烟花入暮愁  
碩園詩稿

卷六

八

一夕醉歌千古事定教星色動神州

玉峯晚泊偕素文其長孝威宮聲家次谷各賦得

微字

寒潮寂寞打空磯尊酒蓬窗對翠微  
兄弟十年心共許山河千古事還非  
月明畫舫青簾捲天濶晴江白鳥飛  
却話西冷孤棹穩故園未許得同歸

次夕泊青溪得儕字

荒城寒柝動空街把酒論文興不乖  
天畔青山明月路燈前綠酒故人懷  
最傷范叔袍誰問猶喜張華劍未埋  
一曲叩舷還自賞千秋詞賦本吾儕

偕宗季椀珠文子武謀素文勝時其長麗冲孝威



印周宮聲九高茂秦家次谷集子立齋印事

十年賓客倦遊梁，此夕名流會一堂。  
鏡裏湖山還氣象，杯中花月更文章。  
星辰色動淞江水，鴻雁聲催茂苑霜。  
勝賞南皮遺事在，雄風萬古獨蒼茫。

勝時宗兄系本瑯琊投詩見贈兼敘家乘走筆奉

答併呈伊人印周兩宗兄

過江門地說吾家，瓜瓞重尋喜倍加。  
間氣自知牛斗合，名宗應許鳳麟誇。  
槐堂舊賜中丞第，薇省新看上苑花。  
風雅只今堪共數，千秋遺業一瑯琊。

贈彭古晉

憶昔皇朝全盛年，書生結客風塵邊。  
雲間婁水聚星色，

碩園詩稿

卷六

九

中原縶韉相周旋，當時作者並千載。  
直排閭闔捫青天，昆明劫灰忽焉改。  
華亭鶴唳聲淒然，鄴下名流昔已沒。  
梁園舊侶今誰憐，我來東海見彭子。  
崎嶇歷落驚四筵，玉面清臚髯似戟。  
披襟朗吟白雲篇，由來峯泖多名賢。  
詞賦往往凌雲烟，大江以南十萬士。  
怪爾英雄先著鞭，章生王生稱無前。  
周生錢生皆翩翩，酒酣擊筑更起舞。  
今宵佳會堪流崑崙之山，從空開黃河之水。  
如奔雷鯨魚百尺立其背，高歌拍手歸兮來。  
遙指白雲是蓬萊，手摘星辰何崔嵬。  
倒注滄溟吐日月，天地何有於我哉。  
彭子胸中本突兀，世人齷齪安得知。  
其才相逢握手感君意，平原十日相追陪。  
繫我青輪舟酌我黃金壘，千秋

寧有待勸君休徘徊一朝振策登樓臺左揖班馬右鄒  
枚浮雲六合空睥睨男兒豈得終蒿萊君不見李杜文  
章自金石張陳意氣俱塵埃交情世事多如此一曲長  
歌萬古哀

連夕偕諸同社飲李素心齋

五陵豪客共淹留十日芳筵會勝流銀燭光高渾似晝  
玉卮手暖不知秋詞人並列應劉座才子將分李郭舟  
明發倩誰催別意鳳笙龍笛奏涼州

歸舟別吳門三子

霜天葉落雁聲殘攜手河橋淚不乾吳越千年興廢易  
弟兄一月別離難鷓鴣曲罷歸帆遠鸚鵡盃空客夢寒  
碩園詩稿 卷六 十  
腸斷幾番風雨夜隔船燈火話江灘

偶見四首

簾下新妝最泥去聲人亭亭小立動香塵鳳凰釵滑端宜

髻蛺蝶裙輕穩稱身紅破櫻梢偏惹笑青迴柳葉獨含  
顰投珠解珮知何意要賺詞家賦洛神

銀泥衫冷剪單紗秀靨分明映晚霞掠水試風羞燕子  
橫參落月近梅花心香未熱情原許手語先通夢尚賒  
愁殺粉牆斜日下門前輕過小紅車

團扇殘緣隔兩生菱花重照恰盈盈箋池上堪臨帖  
銀燭窗前好合箏赤鳳紫鸞雲有恨青天碧海月無情  
何因却向西鄰住狂殺文園渴長卿

百斛珍珠未足酬多情  
端合嫁風流  
明妃恨事同青塚  
杜牧愁時欲白頭  
淚盡竹枝魂  
漠漠殘桃葉  
路悠悠  
擬銷綺語生平障  
禪榻  
揅今坐一秋

上宮允韓芹城先生

龍門百尺競天高  
海內蒼生屬望勞  
彩筆獨題鳩鵲觀  
玉鞭遙出鳳皇曹  
吳闕氣色千年壯  
薊國文章八代豪  
慚愧驊騮曾一顧  
登堂倘贈呂虔刀

上姜大行如須

幾年持節侍長楊  
仙吏聲名滿帝鄉  
天下高山推泰嶽  
人間才子重萊陽  
揮毫漢署搖星斗  
作客梁園見雪霜  
詞賦三吳誰得似  
風流原屬古諸姜

碩園詩稿

卷六

十一

廿四夜同子做素文飲其長齋

歲晚重相對  
西窗共此宵  
孤舟闔閩雨  
殘夢浙江潮  
其長新從浙歸  
爆竹愁中聽  
燈花醉裏挑  
傷心鴻雁影  
離別又

明朝

舟夜

卒歲闕河隔窮途  
霜雪增昏鴟  
爭岸樹寒蟹  
傍窗燈遠  
水明如月孤  
舟靜似僧五  
更聽舵後理  
權破層冰

碩園詩稿卷七 辛卯

春閨

油碧春時競勝遊，綠窗深掩獨清幽。  
梨花有恨催新夢，楊柳無情縮舊愁。  
十里錦韉迴紫陌，數聲玉笛倚紅樓。  
關山路遠人何在，可有音書寄隴頭。

代上鄧邑侯

仙鳧映日下明光，海岱青雲近帝鄉。  
登座生徒傳禮樂，停車父老說耕桑。  
曉簾山色侵書案，午閣花香拂印牀。  
竚看仲華行拜袞，大庭今不數龔黃。

春日齋居雜感四首

社火春燈未過期，椒盤柏酒尚堪思。  
每因多難悲天地，却爲無成感歲時。  
舊燕定巢來暖閣，小魚窺藻出冰池。

碩園詩稿

卷七

物華事事堪遊玩，潦倒惟傷有鬢絲。  
萬里浮雲共愴神，立亭蕭瑟又經旬。  
雨中對酒逢寒食，病裏看花憶故人。  
十載山河無限恨，百年風月可憐春。

蒼茫南北音書遠，回首風塵礙角巾。  
春陰十里淡如烟，愁裏看春倍可憐。  
照地紅樓傷杜曲，連雲碧草怨湘川。  
梅花已冷三年夢，楊柳還傷二月天。

此日故人俱寂寞，懸知郢雪競新篇。  
草堂原在舊城阿，三月春愁少客過。  
日落柴門喧鳥鵲，雨晴花塢映藤蘿。  
欄衡意氣貧餘壯，庾信文章亂後多。  
往事不堪重入夢，青雲踪跡悔蹉跎。

郡中偕雲間毘陵諸子社集二首

詞壇鞭弭此追陪  
意氣中原好共推  
水勢欲驅湖泖合  
劍光還許斗牛開  
清流並入龍門座  
雄辨羣誇虎觀才  
把酒揮毫吾黨事  
江山萬古一銜盃  
蘭亭風日喜初晴  
重向雞壇結舊盟  
二俊高名黃歇浦  
千秋佳氣闔閭城  
衣冠王謝原前代  
詞賦曹劉自後生  
翹首試看今夜裏  
斗間星色爲誰明

落花二首

芳園春色已摧殘  
銀燭金樽夢裏歡  
樹底覓來魂易斷  
隴頭看去淚難乾  
荒池晝落驚魚陣  
小店晴吹拂馬鞍  
遙憶江城橫笛處  
玉樓人倚幾闌干

碩園詩稿

卷七

二

金谷春歸眼暗驚  
不堪荒樹亂啼鶯  
數枝蕭索同衰況  
幾點飄零似別情  
吹到碧窗看有影  
落來紅雨聽無聲  
傷心此日相隨伴  
陌上楊花水上萍

虎邱晚眺偕子做衡水鴻調

遊客蕭條上翠微  
閒憑飛閣思依依  
穿花百道紅泉合  
繞塔千層碧嶂圍  
虎去荒邱空茂草  
鳥啼廢堞迴斜暉  
相攜幾斛興亡淚  
共向峯頭一濕衣

東邨

東郊遊屐又匆匆  
自怪年年感慨同  
急雨乍添瓜蔓水  
輕寒欲散棟花風  
開樽芳草憐愁裏  
卷幔浮雲憶夢中  
落日不須傷往事  
人生踪跡本飛鴻

擬古二十九首并序

擬古之作自昔難之蓋以寫他人之胸臆則聲  
情俱非已出規諸家之口吻則意境猶病難兼  
惟江文通擬古雜體詩二十九首昔人以爲勝  
於自運入明亳州薛郎中蕙爰有嗣響而畧其  
十人僅得十九首至先司寇乃益之爲七十首  
自蘇屬國起訖韋左司止也亦可謂究五言之  
變矣余端居艱歡偶披先集輟命筆效其意爲  
之自李都尉至休上人如文通原擬之數凡十  
日而畢友人章子湘御見之頗極嘆賞自愧得  
其皮毛失其神理要以借此戲墨用銷閒晷云

碩園詩稿

卷七

三

爾

李都尉陵從軍

浮雲暗白日遊子之何方出門顧徒御百酒一再觴風  
蓬忽離根此別良足傷前路黃塵飛按轡中徬徨慷慨  
撫玉劍意氣還相當金石諒在心願子以無忘

班婕妤詠扇

皎皎一紈素齊宮舊機杼裁作合歡扇君王手中貯惠  
風從飄颺明月用延佇一朝失炎氛捐棄不得語舍情  
欲何申雅潔良自許妾意無曩今君情有寒暑

魏文帝不遊宴

飛蓋臨西園高會乘良時曲汜朱華披叢薄秋蘭滋儵

魚窺密藻好鳥鳴芳枝曠然開澄眸因之攄清詞渺渺  
千紀心攬鏡悲霜絲世運爭銷盈讌樂當及期銜歡惜  
夕陰皓月輝高林眷言美人惠貽我瑤華音

陳思王植贈友

西征發中路驅車越函谷憂來自多緒誰與寫心曲翩  
翩二三子辭采麗朝旭鸞鳳既軒舉蘭蓀亦芳馥天網  
方高張禮賢意優渥巍巍建章臺其下文華轂雙闕中  
徘徊冠蓋日相屬志士中夜傷文軌阻吳蜀季子輕寶  
劍下生惜良玉自昔崇令名何人嗣徽躅親交義所敦  
裁書共相勗願子愛景光努力佐清穆

劉文學楨感遇

碩園詩稿

卷七

四

南山一喬木根幹何輪囷上有雙飛鳥交頸通慇懃榮  
華豈不願和合良所欣伊予抱沈悵寂寞當蕭晨仰視  
漳河水白日飛埃塵長恐先霜露弗得奉明君猥承元  
后眷庶養有此身簪筆入禁省廁身侍從臣涕淚灑衣  
袂銜感知難申庶幾偕羣士歌頌嬉陽春

王侍中粲懷德

西京方喪亂豺虎盈神州白日收晶光朔風吹颼颼躑  
躑蠻楚間致身乏良籌徒抱功名志還爲羽翮憂滔滔  
江漢水日夜無回流年命會有盡顯塞難自謀遙望長  
安路搔首心悠悠褰裾欲北渡川梁何阻脩疇曩違我  
公情盼殊綢繆征鳥聯翩飛依棲得優游霜霰迴春陽

樂土長淹留朝陪建始讌夕向鄴城遊自傷朽鈍姿頗  
懷伐檀羞何以展才業致使君恩酬

嵇中散康言志

韶齒抱幽憤苦爲世網牽嗟哉塵俗人知德蓋誠鮮鳳  
皇棲榆枋斥鷃飛其前神龍困泥淖乃受蚯蚓憐天地  
自久長日月空推遷柳下志何曠首陽道亦偏懷想原  
憲貧感歎老萊賢期以冲靜襟飾此頑疎愆珪組行謝  
免名譽同棄捐端居養營魄無累神終全蘇門有真人  
縹緲疑神仙誓將從之遊吟嘯高山巔

阮步兵籍詠懷

步遊梁王城日暮登高臺英雄去不返千載生餘哀俯

碩園詩稿

卷七

五

身視九圍萬物如烟埃草草百年事逝晷不可回柱下  
本神師漆園非吏才揮手招其人區外同徘徊

張司空華離情

淒颼驚秋閨明蟾映烟紗蘭燈耿未滅坐照當窗娃絡  
緯四壁啼轉使愁心加感念生別離邈如風吹花青草  
日以萎王孫不思家髻髮長鬢曲顏色空芳華角枕羞  
獨夜攬衣悲無涯孰是秦樓人吹簫凌紫霞

潘黃門岳述哀

青春悶幽壑白日埋層陰颯颯哀颺吹肅肅清霜侵顧  
此蘭蕙姿惆悵難重尋明鏡照仍昔朱顏凋自今帷風  
動華燭梁塵棲素琴殘綺兩鴛鴦如覩之子心髣髴精



爽通靈駕儼然臨况兮失音形幽魄還沈沈年逝惜孤  
影夜長知單衾惟有涕淚垂猶復雙溪漢淫流目翫景物  
悲來益難禁連理庭中樹交頸園中禽傷哉巫臺夢徒  
爲蒿里吟

陸平原機羈宦

夙昔產華宗門業高三吳素心保先緒浚谷守拙迂寒  
暑俄推遷總轡來京都徒旅慘不言當風立躊躕明星  
臨洛汭長飈起朔塗嚴坳絕巒峩崇山鬱盤紆側耳寒  
蟬嘒矯首歸鴻徂眷言宗國遙清臆傷羈孤黃鵠飛千  
里還憩故山隅岵嶺青雲路仰盼何崎嶇翩翩宦遊子  
簪紱勤令圖車馬共光輝鐘鼓相戲娛富貴誠可樂展  
碩園詩稿 卷七

六

轉慚馳驅懷忠際嘉遇所惜在區區

左記室思詠史

長安多貴遊車馬方滔滔仰結荆冪儔俯懾金張曹仗  
劍清河朔跋履登皇朝歸來脫駟鞬拂衣卧林臯丈夫  
慕功名所願稱雄豪毘勉事墳圯將無達者嘲緬惟古  
賢人顯晦良殊遭阿衡傷負未呂望借鼓刀箕山有野  
叟乃敢輕唐堯睥睨遍千載壯志凌層霄鸞鴻已高騫  
黃雀空鳴咷

張黃門協苦雨

西顛重陰凝秋旻愁雲結玄冥威方張陽侯怒未輟翔  
應焦明占舞兆商羊孽矇昧識蟻封曠靄徵鸛埵川光

潤以浮山氣淡如滅哀颺衣袂侵慘色檐楹閉寂寞守  
寒稿拊心自切切野田下鳩鵲虛堂啼蜻蛚溝決垣欲  
頽竈濕薪難爇禾稼會漂流生計轉騷屑顏子歎簞瓢  
莊周悲涸轍固窮義所甘願希古賢哲

劉太尉琨傷亂

立穹未悔禍宸極妖氛驚懿親亂天紀哲婦危宗祊朔  
風吹颺颺鋒鏑盈西京原野並川坻白骨方縱橫志士  
痛心目長喟皇圖傾戮力獎王室顧盼期澄清驅馬向  
司冀揚旌指幽并影節慕古人戡定思曩英齊桓困射  
鈞卒合葵邱盟晉難由驪姬乃顯重耳名羲畧日以邁  
功業何時成中夜望秋旻耿耿橫欃槍吟嘯撫龍泉憤  
碩園詩稿 卷七 七

惋良難平

盧郎中謀感交

英人志鐘鼎烈士慕溝壑功名莫厭卑意氣莫嫌薄感  
公謬昵愛雅誼眷孱弱蚤締薦蘿親還許侍帷幕顧此  
和氏珍拂拭令光灼騏驥方悲鳴一朝邁伯樂日夕陪  
清塵何以贊英畧慷慨將自今乖離已悲昨習習北風  
吹四野卷飛藿夙昔欽前賢中心自慚忤侯嬴殉公子  
捐生重所托荆卿死秦庭恥負燕丹約登闈恣夕眺遼  
遠痛蕭索苦受纓綫拘不獲遂棲泊裁章寄南雁攬淚  
向秋籜苔芼物雖微可以表誠恪

郭弘農璞遊仙

羽士鍊真氣冲舉非爲難縱身躡璇霄弭駕登神仙側  
目紫林深回首翠水寒靈妃駕飈車素女乘飛鸞衣我  
青霞裾加我蓮花冠煌煌三芝草摘以供晨飧能使魂  
與魄千載常相歡憫彼塵寰人駐顏無金丹羲和日驅  
迫形神易摧殘擾擾萬象中一顧生長歎

孫廷評楚雜述

萬化何茫茫世變日爭逞子淵自不辰伯陽亦其幸炎  
旭西裔沈悲風北邙警展轉生死間呻啞等蛙黽真人  
輕幻軀達士惜當境服餌資長年何如守貞靜朝困良  
已短喬松未云永不覩蜉蝣羽榮衰變俄頃歲月駛以  
馳慨焉撫流景化心靈足傷立化會有省三復知命言  
碩園詩稿 卷七 八

微尚聊自秉

許徵君詢自序

哲人貴推移大道尚舒卷冲標洵有寄衆媵詎堪戀念  
此謝冕軒奮身脫絳鏃結廬委宛峯蕭然寄遐盼遙林  
特清舉羣卉並娟倩陰崖真氣入寒柯靜心見潁濱跡  
可追商山事堪羨行歌黃農詩喟想採薇彥藉茲頤心  
神亦以遂疎賤

殷東陽仲文興矚

吐飈起庭隅寒曦曷云夕時序方蕭條景物自清適曳  
絢發微吟獨欣獲棲宅山林亦尚遙邱園良已隔高榭  
延烟霞虛窗翳松柏堂下臨方池明鹽湛初碧寓目萬

理陳冥心在所擇曠然軒楹間如見古人迹

謝僕射混遊覽

遊賞有眞理哲匠知其微觀彼晨葩鮮倏爾夕霰飛羲  
輪不可挽曩跡今都非夙興出郭門綿野紛芳菲驅車  
指隰坻迴擢沂江圻雲岫媚華景霞浦澄清輝搔首念  
彼美顏色猶依稀怒然傷道遠中懷徒渴饑喟息此人  
事如何令心違聊復撫羣景流玩隨天機

陶徵君潛田居

結茅向東臯種苗在南邨日西荷鋤畢偃息歸柴門逸  
興寄菊松餘事消雞豚鄰叟間夕過相慰多子孫盤飧  
亦草草共坐傾青樽快然耳目間乃有眞樂存孔周意  
碩園詩稿 卷七 九  
何厚羲黃道自尊耕鑿得所宜聊以供饗殮

謝臨川靈運遊山

夙性耽名山及時攜勝侶考跡搜圖經擔簦事行旅蓮  
塘屢沿洄蘭薄始延佇靈宮森槐柏塔鈴半空語鼓擢  
聽水聲激波叶音呂參差度虹棧崔嵬見霞嶼亂石既  
谿訝長麓亦荒楚猩啼隱密箐雁嘶警荒墅改路由平  
疇川梁坦無阻千叢遍烟火百畝遍禾黍周覽豈云倦  
靜心內堪貯乍歷忽前踪久翫惜餘緒放懷夙所謀委  
運今自處揮手五嶽遊尚平可相許

顏特進延之侍宴

神垆亘中天圓闕凌層宮聖德躋軒轅盛舉追崆峒鑿

躅集飛蘿清蹕臨華桐璇題隱喬雲繡拱生文虹清醪  
百壺送珍膳九俎充八璈並鏗戛六律相和同溫克飲  
無醉駢筵歡未終遙情啓皇眷雅詠發睿聰雄風邁楚  
臺樂事陋齊宮謠頌溢康衢稽拜臚羣工銜恩荷鴻私  
責已撫微躬邁跡廁簪纓退食漸熙隆引領矚昌暉歌  
祝同恒嵩

謝法曹惠連贈別

春陽理晨裝將爲千里遊岸柳青萸生汀蘭翠萌抽威  
紆喟前途岑寂嗟故邱鷁首指西陵瞻望心悠悠悠悠  
就遠道依依眷城郭哲兄絕寡歡分慮痛飛藿伊子事  
長征寄世類漂擢流連咏原鴿廬園感疇昨疇昨在東

碩園詩稿

卷七

十

山相娛論文史振響答清篁攀芳惜香芷年逝事隨變  
故悰委流水弭櫂中徘徊颺颺瑟風起瑟風日以厲難  
爲客子襟拔木噫飛廉揚沙息燭陰立霄蔽朱羲雨雪  
凝重陰行滕逗江涘永夜悲商參商參不相覲韶景空  
蹉跎赭鱗思舊沼驚翼懷宿柯孤臆自宣寫濡翰裁新  
歌湖草不久碧眷此傷如何

王徵君微養疾

清軒激秋風林木析析吹卧疴屏人事斐疊來立思淨  
色自相映邈矜仍相期蘭風馥長坂蕖露潤清池流觀  
暨翔泳悟此萬化移駕言引遐齡求仙採丹芝湘水有  
餘清委懷諒在茲

袁太尉淑從駕

瑤壇先夕肅寶輦當晨過宮槐護羽蓋苑柳拂雕戈儀  
衛赫金練趨踰粲玉珂天儀洵奕燁神宇誠蒐戩奉旗  
下翠鳳伐鼓震靈鼉吹管號孤竹調瑟稱雲和達誠瑄  
籟備薦芬營鬯羅祥光耀奇草瑞應微嘉禾宣惠賚粟  
帛觀風陳雅歌駿奔共羣士扈蹕沐恩波頌述托微穎  
慚覲良爲多

謝光祿莊郊遊

進棹向石圻稅駕在江亭息陰憩芳樾懷古捫殘銘延  
瞰發超緬隆想寄峇嶠千峯盡黝紫萬木半蔥青風泉  
自勺礪霞浦仍淵渟雅節嗜棲逸雅志凌滄溟願偕金  
碩園詩稿 卷七 七  
芝侶冥心禮仙靈

鮑參軍昭戎行

桑枯隴水乾雲黃戍草迷素沙如雪起殺氣蒸鳴鞞軍  
中有壯士家世本河西雕弓豹革鞬急裝跨青驪穿圍  
冒重險短劍身自攜四面矢蝟飛轉戰日已低遊魂失  
歸路浴血陰山啼部曲收殘兵惟見空馬嘶至今薊門  
北過者生悲淒捐軀報天子千載稱男兒

休上人怨別

湘水自然碧江草亦已黃寒蟬饒苦音秋卉多奇芳庭  
前雖種萱沈憂詎能忘蘭缸耿午夜明月愁中堂深杯  
酢殘醕寒爐滅餘香錦帳羞空懸寶瑟嗟虛張揚鬢盼

征駒日夕心悵悵

西田歌壽王烟客奉常六十

西田奉常公所隱處也

歸邨邨深林木寬

西田一  
名歸邨

四面溪流沈瀾萬卷圖書

數楹室中有百箇青琅玕歸邨先生居其內觴咏之暇  
垂漁竿借問先生誰姓氏相國名孫太史子身作先朝  
老奉常拂衣還卧婁江里在昔隱者稱淵明寄托往往  
多深情棄官非爲五斗米義熙年間寧遠爾東籬今復  
聞西田風流標格凌其前最難避世同梅福却喜傳經  
有韋賢傳經令嗣氣咆勃驥子鷄雛盡奇兀來日蒼韞  
上壽時知列華堂幾牀笏庭畔三株柏葉漿階前九色  
肉芝光樽中將進千秋酒一曲長安金鳳皇

碩園詩稿

卷七

十一

江行二首

楊子征帆健丹徒客夢喧潮平千水合雲濶萬山吞遠  
浦橫黃鵠晴波戲白黿高歌懷祖述西北是中原  
曉發雲陽路江平慰客途高風蘆荻嘯急雨鸛鷺呼潮  
勢爭來去山形互有無篙師指點處猶自說南都

登金山二首

孤雲遙聳妙高臺把盞登臨憶賦才日落鼉鼉衝岸出  
秋深風雨度江來百年雉堞猶烟火六代衣冠盡草萊  
多少興亡今昔事亂潮滾滾幾時回

壯遊偏喜上孤亭望斷長江酒忽醒檻外暮雲迷北固  
窗前秋雨散中泠波懸練影千層白山界天光一抹青

莫倚最高吹鐵笛深秋恐有老龍聽

朱生歌贈朱商石

江南九月秋風吹我茅屋聲聲悲志士中夜起三歎  
坐看轆轤寶劍牀頭垂七尺之軀亦何有萬歲千秋一  
杯酒丈夫不能手挽三石弧賭取金印懸其肘又不能  
身擁百萬青銅錢高車駟馬遊翩翩徒握毛錐三寸耳  
蓬居藿食宜其然君不見朱生奇才被挫折十年猶在  
菰蘆卧青衫憔悴無人憐五經諸史日自課道旁之夫  
笑且譏天雨十日妻子餓又不見肥肉天酒東家子昨  
朝已得爲貴人座中低眉折腰客誦其文章稱絕倫文  
章自古知誰真黃金往往能致身世人齷齪那足數

碩園詩稿

卷七

七

事翻覆寧堪論王生今年二十五從前不解讀書苦邇  
來恥受造物欺會與朱生事千古海內意氣還吾曹放  
歌一曲明星高儒者應爲當世用朱生慎勿終蓬蒿嗚  
呼朱生安得終蓬蒿

10687



